

5403/82 (1-10)

8

STANDARD-YENCHING LIBRARY
HARVARD-YENCHING LIBRARY
1 DIXON AVENUE

CHANGING

NOV 8 1961

HARVARD-YENCHING LIBRARY
HARVARD UNIVERSITY
2 DIVINITY AVENUE
CHIAOLI

NOV 3 1957

太師誠意伯劉文成公集卷之十四

芝田令新陽後學萬里續梓裔孫標男宗燦編

七言古詩

為祝彥中題山水圖

高軒玲瓏不受暑半幅輕綃宿烟雨白屋素壁生空明似聞
水聲繞庭宇松髯拂天藤蔓垂枯根瘦石相因依寒濤不驚
虎兇臥嵐翠欲與蛟虬飛空江悠悠一漁艇渚白沙明萬魚
靜武陵桃花何處尋落日微風片帆影

徐資深華山圖

華嶽插天七千丈丹崖翠壁開仙掌壁間摩出黃河流大禹

哈佛大學
圖書館
珍藏印

徐資深印

以之分九州河流衮衮赴溟漲華嶽拔出天河上雲宮霧窟
疑本無石室金臺儼相向玉泉高通玉井津中有蓮實如車
輪世人肉食未羽化可望不得聊相親高堂晚晴圖画展眼
明一見心自遠世間塵土今紛紛吾當拂衣臥山雲

永康胡元鼎白雲樓

少年辭家往京國蓬根一斷無消息有時長想白雲飛江海
茫茫淚霑臆歸來拜母悲且喜悔作他鄉遠遊子卻起高樓
對白雲綵服翩翩足甘旨昔時望雲煎百慮今日看雲美無
度卻憶天涯望雲日平生心事從此畢

贈醫士黃元之

先生軒轅之子孫手提萬物生死根神功微妙不可狀能使
元氣回遊魂篋中禾芽抽粟粒丹光照耀三彭泣銜珠不受
修蛇報采藥常令白猿拾結廬幾歲吳山阿赤松玄俗時相
過更向蓬萊下神水併與人世清煩痾

中峰永先和尚醉墨圖

老先行脚遍天下五湖七澤曾中吞淋漓醉墨落人世恍惚
目擊瀟湘存蒼梧飛龍去不還洞庭赤沙流水渾九疑竹枝
餘淚痕灑蘭沅芷化蕭艾古木兩炫寒烟昏雲帆縹緲向何
處波浪瀕洞驕魚龍我生胡爲羈旅間感時覩物生愁怨還
君此画歌一曲悲風慘淡來崑崙

夜聽張道士彈琴

道士字君度

白澗含光月照席梅花入簷珠的皦葢宮道士彈七弦明星
在樹霜滿天鏘如暗泉發幽竇悄若空山叫哀狖霧雨寒吹
松栢響波濤怒激蛟龍鬪神奔鬼怪入杳冥鸞孤鶴寡風冷
冷湘娥宵攀竹枝泣紫鳳曉啄梧桐鳴悽悽欲斷還復續啼
鴛一聲春草綠砉然清商行素秋落葉灑地蟲啾啾擁衾聽
之消百慮夢逐行雲自來去九疑連天洞庭遠海闊烟深不
知處葢宮道士聽我語世無子期誰識女桑間濮上方施行
白雪陽春棄如土

辛卯仲冬雨中作二首

江城積陰愁玄冬千家萬家雲水中烏啼黃昏鴈叫夜鼓角
慘澹愁悲風青燈無光掩關坐飢鼠相銜啼過我讀罷殘書
有所思凍雨霏霏淚交墮
歲云暮矣風蕭蕭木葉脫落惟空條雲濃雨細白日短慘慘
不辨昏與朝雨中行人足斛觔去與公家製戎服中原豺虎
正橫戈天寒風急奈爾何

悲杭城

觀音渡頭天狗落北關門外塵沙惡健兒披髮走如風女哭
男啼撼城郭憶昔江南十五州錢塘富庶稱第一高門画戟
擁雄藩豔舞清歌樂終日割瓊進酒皆俊郎呵叱閑人氣驕

逸一朝奔逆各西東玉竿金杯散蓬蓽清都太微天聽高虎
峒龍韜緘石室長夜風吹血腥入吳山浙河慘蕭瑟城上陣
雲凝不飛獨客無聲淚交溢

夏夜台州城中作

江上火雲蒸熱風欲雨不雨天曹曹良田半作龜兆拆杭稻
日夕成蒿蓬去年海賊殺元帥黎民星散劫火紅耕牛剝皮
作戰具鋤犁化盡刃劒鋒農夫有田不得種白日慘淡衡茅
空將軍虎毛深玉帳野哭不入轅門中健兒鬪死烏自食何
人幕下矜奇功今年大軍蕩淮甸分命上宰麾元戎舞干再
見有苗格山川鬼神當効忠胡爲旱魃還肆虐坐令毒沴傷

和冲傳聞逆黨尚攻剽所過丘壠皆成童闔司恐畏破和議
斥埃悉罷雲邊烽殺降共說有大禁無人更敢彎弧弓山中
悲啼海中笑蜃氣繞日生長虹古時東海辟孝婦草木枯瘁
連三冬六月降霜良有以天公未必長瘖聾只今幅員廣無
外東至日出西太蒙一民一物吾肺腑仁者自是哀鰥恫養
臬殪鳳天所厭誰能抗疏回宸衷夜涼木末掛河漢海嶠月
出光玲瓏仰視皇天轉北斗嗚呼愁歎何時終

老病歎

我身衰朽百病加年未六十眼已花筋率肉顫骨髓竭膚腠
剝錯瘡與癩人皆愛我饋我藥暫止信宿還萌芽肺肝上氣

詩意作文集
若潮湧舊劑再歡猶淋沙有眼不視非我目有齒不齧非我
牙三黃苦心徒自療五毒浣胃空矛戈因思造物生我日修
短已定無舛差玷瓚不能使之少慮秦焉能使之加攻犀豔
朽各有分鳧悲鶴悼何繆耶不如閉戶謝客去有酒且飲辭
誼譁

題松下道士携琴圖

道士抱琴松下行松風入耳清凉生石梁苔滑不可上潭水
泠泠學琴響琴有意兮水無心水中有龍能聽琴琴聲斐斷
水流咽月滿空山落松雪

錢王箭頭篇

鳴夷遺魂拘餘怒欲取吳山入江去雷霆劈地水羣飛海門
扶胥沒氛霧英雄一怒天可回肯使赤子隨鮫鮓指揮五丁
發神弩鬼物辟易腥風開三百年來人事改濤落沙平箭空
在石梁飲羽未足誇蜀國三犀漫欺給近聞黃河水亂流青
徐一半悲魚頭安得壯士斡地軸爲拯斯民塗炭憂

次韻和石末公七月十五夜月蝕詩

招搖指坤月望日大月如盤海中出不知妖怪從何來恟恍
初驚天眼眈兒童走報開戶看城角呀鳴聲未卒蟾逃兔遁
漠無蹤壁隕珠沉一何疾丈夫愕視隘街巷婦女喧呼動圭
竈輝輝稍辨河漢沫耿耿漸明荒冢漆百官抱笏羣吏趨伐

鼓撞鉦仍設鞞赤水難令罔象求澗池莫效相如叱升簷變
閣到空曠瑤掩氛稜殊靡畢廣寒桂樹劫火燼借問嫦娥有
何術今年下土困炎沴草木焦枯野蕭瑟萍號暘死龍甲燼
赤燁當衢掛萍實光芒照灼玄武爛誰復瑣瑣憐蚌鷸今夜
慝作最差異天道幽微孰能詰太陰配日宰臣象無乃常刑
多縱軼近來營壘徧宇內羽林慘澹空鐵鑕荒郊廢市何所
見夔罔蛟蛇兼蚤蠹此皆在地不在天未若蝦蟇狡而猶黃
文結鄰上訴帝賜以小戎驟牡騶剖墓洗魄還月光再起咎
繇明典秩返蟾歸兔復織阿萬古游塵避清蹕

再用前韻

虞淵浴衍納歸日金樞吐月相承出初離積水看若飛稍映
微雲盼猶眴是時蓐收肇視政莎雞振羽鳴蜩卒姮娥靚粧
覲玉帝坎軻中途嬰禍疾旅人苦熱愛清涼快覩光輝滿蓬
華願開寶鑑照覆盆豈擬瘴塵昏點漆隋珠慙固重革櫃和
璧嗟蒙韞韋鞞吳罡樹折不自謀織阿馬弱無人叱三足蟾
驚入坎窪八竅兔走罹且畢圍灰破暈謾傳方屠玉補凹空
著術雷公駭懼罷靈鼓湘女幽憂舍鳴瑟故老謂是蝦蟇精
潛伏姦妖營口實羲和尸位罔聞知可以人而不如鵠往歲
威弧弛其殼蛇豕陸梁誰復詰高牙大纛擁藩垣腸斷吞聲
受陵軼江淮洶湧湖浙沸骸骨成山連鬼鑽萬姓喁喁釜裏

魚百官蠢蠢禱中蟲黃茅白葦棄賢良赤紱玄裳寵獐獮昊
穹示變盍警畏惟德動天天有隲况今旱魃又爲厲東作西
成不平秩安得緘辭伏閭闔 聖主如聞應駐驂

聽蛙

繞舍荒池底且鮒蟄蛙齊候鳴雷社已知地氣上如炊更覺
石泉流若瀉舉頭玉燭煥陽明跼足汗泥悲土苴半夜條風
入綺牕清晨細雨霏簷瓦梁間紫燕舞參差枝上黃鸝語悲
姦播形肖貌均有生感氣傷情孰瘖瘖初聆衙衙雜更鼓漸
聽嘈嘈成侈哆猶持堅白較同異似坐徂丘談稷下村童叫
噪聾學究悍婦勃礩喧姊姐西域胡僧彈般若齊東老生矜

炙輒逸帆觸岸靡蒹葭醉客罵筵投盞竿叟咬誰辨騾兒哇
號若乍開賓叟囁怒牙嚼齧悻羅吞寤言詰屈驚宜樹徒夸
楚使能詈齊未讓秦巫上詛芋堯離僂佻紛覩縷帝樂虛張
洞庭野虞夔奚暇調笙磬周瞽曷由分鄭雅旅人懷憂實無
寐遭此強聒胡爲者得非作姦謀蝕月無奈聚訟騰謹謾昔
聞周公立典教蠲氏專司鞠灰灑常疑聖人茂育物獨向微
蟲少寬假乃今知其非瑣屑欲問官司乞餘地鳳凰鸞鶯聲
苦希白雪陽春和偏寡蚊蠅蚤蟲多於沙鑽啞暗鳴紛醜覩
蝦蟇幸不含毒螫何苦呶號爭肥阿烏鳶逐響蛇聽音寧顧
入腹生癥瘕賦詩卻笑柳柳州恐使腥臊辱菹鮮

贈道士蔣玉壺長歌

先生清如玉壺冰神閑志一精粹凝玄黃健順六子承和氣
塊北麓穢澄坤虛澹澹廓以弘冥茫沕穆怙無能火鳥入海
陰液升鶉蛇受約不敢騰束縛龍虎如寒蠅虛無黃堂帝所
憑四方上下齊鉤繩北幽羅鄴對朱陵女夷鼓歌王母應瓊
宮夜半張華燈金葩碧葉紅氍毹素霞鬱滃玄雲烝沆漉厭
浥淪泉與牽牛織女來相仍用之不減亦不增地官錫福天
官徵老蚌迸殼驪珠升太一象輿驟八鵬翼以六蜺前五騰
風輪蕭蕭生夏凌參旗九旂葭緄滕二八青蛾美目矚翠綈
交翟翺獵猶屬車九九如連繩最後雷軺子所乘流蘓勃罕

垂鏤膺編爛駁馬驪駘躡躡躡霞踏霧碎綺綾天津閣道轡鞞
較歸來瑤臺十二層月光照耀玻璃棚下視瀛海波濤砭龍
宮蜃窟寒兢兢歸塘暘谷清可憑鱗甲鏡瑩鰐與鮫湘妃鼓
瑟冰絲絙擬金戛玉萬穴灑琅玕風吹殷峻嶒琉璃雲母龜
貝朋琳房璧璣瑤階陞素鸞振迅霜女扔璇題瑣牕肅蕙蕙
洞晃矐朗眩遙瞪瘁肌砭髓魂欲歿忽然浮空墮杳霄颺馳
電耀羽脫肱天衢阻遐世網層昏昏日月敲炎蒸句曲之山
宰砌磴楓杉檜栢楛桂柺蘅蘭杜若蕙茵琴綠岡被頰羃礪
塍大地浪井瀑練瀚萍瀕繡繪芙蓉凌鼉乳蚰蚪千年藤纏
絡薜荔縣鬚髻敷芳發馥菲芬芳衛徇徇蝓鵙蒼鷹攀援歛

砦巖崿崩寒蠶蟪蛄蟬犯蟪嵐餐靄飲喧岌岷先生皮冠衣
絳繒桃枝七尺穿虺騰三茅真君共嗟稱星根絕頂時同登
黃斑黑虎陟降凭石罅其漿溢若澗神芝吐啖如簞簋食時
動機保不蕪驅斥瑤瓚除痕瘕眸光照座生紫稜舉觴引滿
鯨喉渠解后見之喜莫勝揚眉抵掌開蒙顛人生嘉會安得
恒靖恭正直天所朽作詩持贈匪妄譏

古歌三首

紅葵高花高以妍清晨方開夕就萎美人迢迢隔山水可望
不見心茫然花開花落日復夜惟覺新年非故年人生百歲
花一度何不作樂令人憐

舊花欲落新花好新人少年舊人老佳人見此心相憐舉觴
勸我學神仙我聞神仙亦有死但我與子不見耳祇言老彭
壽最多八百歲後還如何

雙燕雙飛入我堂銜泥養雛何太忙養得雛成却飛去雙燕
雙飛復如故東園桃李春萋萋日華烘露生紫霓一朝實熟
付人採葉枯枝折空成蹊

道士周玄初鶴林行

鶴林道士軒轅徒以颺爲輪雷爲輿開山養鶴作騏驎上下
二儀周六虛雛成洗髓扶桑窟縞練羽毛鏐鐵骨聲飄碧落
玉清揚影拂太微雲滅沒永夜月明風滿林竹栢憂擊笙簫

音云是旌陽許縣令躡蹻佩劍來相尋靡萍西枝搖倒景借
去林間兩丹頂伐蛟北海奠玄冥斬蜃南訛封浪井上窮列
缺旁九圍却過度朔山中歸歸來贈我桃樹枝朱衣赤郭手
所持令我鞭龍扶虓虎攝縛臊魃如奴虜授我堯時松子訣
轉睛出電噓成雨鍾山秀色連冶城百花繞屋風泠泠焚香
獨坐誦真誥墜露點滴流華星土伯駿奔從號令鶴鳴聞天
空谷應寥陽寶殿歌步虛河漢當窻回斗柄嗟子衰朽雜病
攻盈顛素髮吹秋蓬空餘硬骨如瘦鶴因子致意浮丘公

送李叔允修撰致仕歸鈞州

憶昔西京祖二疎都門供帳羅長衢金張許史集軒蓋彈琴
鼓瑟吹笙竽頽頽鶴髮映霄漢蒼松翠栢紅珊瑚道傍觀者
皆慨歎此才足爲天下模先生胸蟠五車書雍容進退安且
徐披香朝侍紫宸案珥筆晝入承明廬引經論奏動天聽
天語親授非臚句老年謝事歸里閭召見特許兒童扶臨軒
賜膳侑金幣尚食供奉黃門趨夜來微雨清郊墟細黃漚柳
鶯相呼風吹暖烟逗白日露濕芳草畱驪駒雖無旨酒嘉穀
蔬短歌一曲聊踟躕浮雲流水無根蒂人生何者爲驩虞嵩
高少室衆美奧素石如玉泉如酥時清四野樂耕稼雉鳴麥
秀千華敷親朋會合各慰意况有令子知勞劬揮金買酒泳
聖澤怡情之外吾何須西飛鴻鴈東飛魚相思迢迢天一隅

贈言有盡意不盡努力善保千金軀

松葉酒歌寄梁安宅

道人贈我松葉酒味似瓊漿色瓊玖
嚙之骨爽神魂清令我壽同金石久
我生疎懶無所能瘦皮黏骨危陵嶒
病來啖藥猶啖水夢寐恍惚風中燈
常聞徂徠有嘉木玄醴滌濯黃露沐
沐上有兔絲揚翠旒下有茯苓蹲白鹿
咀華嚼葉嚙以津歲久定化腸爲筋
便從偃佺覲黃帝身騎肉角青騏驎
我欲求之百憂集滿眼蚊蠅隨出入
跋鳥箭逝緘阿急日暮空瞻鄧林泣
道人此酒還有方我欲與子同徜徉
世上神仙亦何限畱侯辟穀應未晚

枯樹圖

道傍古樹身半枯白蟻穴根蝨穴膚
風摧雨撼霜雪凍斷石
窺窺無人扶憶昔勾芒肇初政百卉騰達隨呵噓
新柯荏苒舊柯壯霧露膏沐光如濡黃鸝翡翠語
嬌滑桑扈戴勝鳴相呼白鶴來巢鹿止蔭匠石愕
睨爭歎譽寧知憂患生旦夕野火倏忽起不虞燎
原烈焰難嚮邇孰問柞櫟杉與楸枝燔葉
燼根半赤朽腐瞞液非時須山林搖落歲方晏
聊以薜荔爲衣裯嗚呼廣廈棟梁具委棄草莽
同新藟皇天未必替生意更盼玉燭回腸烏

正月十五夜燈花大開作

燈花如管絃且綠燈花有意憐幽獨夜寒衾冷漏聲遲卧看
瓊枝綻金粟涼蟾入戶四壁空地爐宿火天無風祥烟抱日
麗碧落驪龍吐珠歛紫虹人言此花專報喜勞生短髮絲垂
耳无望之福非所希無事惱懷吾足矣呼童添油引良夜九
衢燈月光相射漫沾濁酒餉離魂豈必忘憂惟樹萱

爲韓克銘題画石鼎聯句圖

軒轅道士軒轅孫昔隨飛龍陟岷崙乘騎六氣遊乾坤上窮
混沌無涯門下扶若木扶桑根旋雷舞霓旆晨昏批蹴虎豹
號帝閭搥擊河鼓牛騰騫摘虹織輝絢澤原三足老鳥不敢
瞰迷離缺兔駭且奔羲和顛號訴至尊謫降下土營止樊結

喉長頸古貌存如鶴如鵠如龍蜿詰屈不作人間言涕唾落
地生蘭蓀驅叱碣石歸河源蜚廉屏翳雙挾轡擊捩象齒愁
育賁山玄水蒼琮璫離羅堆錯輝煇燉笙鏞琴瑟箎與壎
五音翕釋珠瀉盆吹爲栗烈呵爲暄撲扶罔象笞鼉龍饒鱓
辟易徙厥屯束縛慘魍魎魂秉畀赤郭充朝飧妙用歛忽
無畱痕嗟哉二子爾曷寃如井谷鮒當化鯢嚶嚶草蟲呼阜
螿欲與螻蛄語涼溫不知風霆掣墻藩江騰海躍喬嶽翻鬼
物喘汗相濡歎爽靈漂搖失所蹲敞菟夢寐精魄惜低頭拜
伏誓再論陽春二月花滿園掩關獨坐辭辭喧按圖索意聊
滌煩羨君軒轅之後昆浩歌一曲期勿諼

寄贈懷渭上人

老僧懷渭字清遠曾蟠文史三千卷雪晴太白玉爲峰月出
藍田金作嶽少年挾策走四方要看蓬萊水清淺燕山帝京
龍象會璿臺寶林發關鍵橫空鵬鶚檄高秋縱轡驛驅逸長
坂龐眉老宿皆震驚觀者解頤陪者赧奎章學士虞邵菴喏
喏稱誇枯舌本連床笑語到晨雞走筆贈言何款悃轉頭霜
雨四十年萬事茫茫不堪付江湖簸浪客舟寒地爐宿火僧
房煖我來邂逅一見之憶曾相識嗟成謾世士如公良所希
方外只今還有限我如野馬貫藪澤絡以羈鞶知必跪老來
耗耄百事違况俾三廬宅愁眼甚欲歸依白蓮宇其柰素餐

非力墾寄言聊復寫中懷白石清泉猶未晚

金碧山水圖

武陵桃源今有無展畫渾如夢中見青螺作山綃作雲白日
蒼茫曖芳甸雄梁跨壑矯修虹走瀑懸嵯激飛電紫鳳宵鳴
梧樹枝青雛曉啄桃花片鳥啼長是豔陽時草色寧隨霜雪
變衣冠尚存周典則租稅不輸秦郡縣山中肉芝美堪食澗
底石泉清可嚙安得此地結茅屋寄書漫託雙飛燕

雪晴偶興因以成篇

玄雲四垂天黯黮大野蒼茫飛雪糝北風刮面利如刀海氣
昏昏迷遠覽若華東光封密霧比屋無烟色悽慘天姥沈陰

禹穴閉扶胥海濤渾不撼愁埋朱鳳入杳冥凍縮赤蛟深坎
窞猿狖哀號咽巖谷鴻鴈驚啼亂葭菼壯士金戈鋹鏗凌將
軍玉帳旌旗黻師徒百萬盡熊羆幕下從官皆燕頤馬蹄蹶
蹋坤軸震夜半入蔡何人敢蒼山野客拙且懶旅舍蕭條坐
無毯頑童汲井十指直稚子敲冰兩髦髡今朝出日照梁棟
樓外遠山皆菡萏初驚急溜瀉源泉漸看縣澗掛旒紈那無
美酒洗胃臆空有新詩吐肝膽先人敝廬松栢在墻角早梅
應可擘蝮蛇張鱗虎掉尾平地倏忽成窟壘藩閫官曹厚祿
食忍以黔黎爲醢醢天民日望天愛憐破瓦頽垣最悲憫農
家齊仰二麥成且喜土膏滋九坎清晨樹上啼布穀柳下碧
波漪澹澹安得扁舟泛五湖莫使中心攢百感

題羣龍圖

世間萬類皆可觀茫昧獨有鬼與龍此圖畫龍二十四狀貌
詭譎各不同得非物產有異種或曰神變無常蹤一龍撻尾
欲上木足爪猶在齋法中一龍出穴飲澗底頭上飛瀑瀉白
虹前有一龍已在雲顧視厥子揚雙瞳浪波魚鱗沓袞襪日
車缺北天無風中庭兩龍忽相逢須眉葩髯如老翁便欲角
觝爭雌雄西望積石接崆峒白龍擘石窺流深河伯遠遁虛
其宮屈蟠睡者何龍鍾老物用亢時當終峽外六龍獰以覓
矜牙舞爪赴戰攻齧鱗嚼甲含劍鋒陷胸折尾波血紅之死

弗悟人誰恫一龍引航將欲從迴環睢盱未敢通最後一龍
藏於控睥睨勝敗非愚蒙無乃有意收全功雲中弄珠勞爾
躬不如卧沙之從容龍子學飛力未充母在下視心憧憧何
物一角額準隆觚然出洞若蛇蟲有龍接之自龍從恐是鞏
穴王鮪公皮骨始蛻形猶蒙兩龍歸來倦不狎癡龍攀石身
已靡蚘蚪偃蹇歛騰衝蛩蠃攫躍鬚髮茸呿呀奔拏曲如弓
百態並作何紛麗是耶非耶孰能窮畫師昔有僧繇工能令
真龍下虛空安得伶倫截竹筒吹之呼龍出石罅使我一見
開昏瞢

爲丘彥良題牧谿和尚千鴈圖

往時惠崇畫蘆鴈對之如在江湖游只今此圖又精妙中有
千里瀟湘秋乃知浮屠性多巧意匠不與凡夫儔吳松江長
具區闊天目赤丘青一髮西風九月秔稻黃朔鴈飛來翼相
憂農夫苦飢鴈獨飽此意畫師應識察近者分明辨羽毛遠
者縹緲瞻秋毫或乘飄風入烟霄或翳落日沉隍濠起如武
侯布八陣集如萬舞回旌旄眠沙卧草鳴且鶻喋呷藻荇亂
蓬蒿禾空穗盡却歸去紫塞漠漠春雲高我家南山限蒼嶺
鴈飛不到川路永深林大谷蛇豕盛愁向他鄉撫虛景人言
鴻鴈比弟兄我有兄弟隔兩城題詩卷畫謝客去無使感愴
傷中情

詞意什文集
雨中寄用章上人

月盈復魄已過五不見白日長見雨美人娟娟隔巷陌會面
不得徒延佇若邪當門泉湧礎伸蔚蓬蒿塞環堵陰風向人
作秋氣芳草日夕成宿莽玄圭上天禹穴閉倉水使者今何
許玉京羣仙翳煙霧弱水西流隔玄圃女夷鼓歌不自覺朱
鳳翅濕那能舉自從干戈起淮甸天下無處無豺虎微歛頻
煩轉輸急更有何鄉爲樂土翳桑餓人誰復數思家遠客空
悽楚半生身世付浮雲獨立看雲百憂聚晚來天南橫絳虹
雨勢未已愁雷公并蛙谷鮒俱得意汜濫潢潦登穹隆方外
文章誰最好後有嬾公前笑老裁詩忽漫寄中情萬事茫茫

聽蒼昊

玉澗和尚西湖圖

大江之南風景殊杭州西湖天下無浮光吐景十里外疊嶂
湧出青芙蓉百年王氣散荆棘惟有歌舞畱歡娛重樓峻閣
競鉛黛媚柳嬌花使人愛老僧不善兒女情故作獬豪見真
態想其泚筆欲画時高視画工如小兒千巖萬壑吾意匠夸
娥巨靈吾指麾却憶往年秋雨夕画舫衝烟度空碧蒼茫不
辨雲與山但覺微風響蘆荻須臾冷月迸深霧時見松杉半
昏黑開尊命客彈焦桐扣舷大笑驚海童鮫人唱歌魚鼈應
水底影動雙高峰只今倏忽成老翁可憐此樂難再逢愁來

謝意任文集 卷之十四
看画欲自適誰知感生愁轉劇

顧周道山水圖

憶昔晉時顧虎頭能画聲名塞穹昊千載而下繼者誰君之
耳孫字周道江南山連滄海島水遠山長愁絕倒典來走筆
如有神濃抹淡粧無不好前峰倚天自太古知是天台是天
姥烟開浪波搖浦澌草滿江洲樹如羽山迴兩崖夾幽谷小
橋俯映菰蒲綠扁舟何處覓鱸魚滄浪水寒空濯足柳邊碧
石明素沙茅廬似是陶公家衡門晝掩雞犬寂誰人共采黃
金花我屋雙溪松栢裏清泉皎潔無泥滓鳳皇不來鷹隼逝
白日鵙鴉嘯桑梓華表柱頭丁令威風塵瀕洞何當歸感時

對景重回首不知人民今是非

題富好禮所畜村樂園

我昔住在南山頭連山下帶清溪幽山巔出泉宜種稻繞屋
盡是良田疇家家種田耻商販有足懶踏縣與州西風八月
淋潦盡稻穗櫛比無蝗蝻黃雞長大白鴨重瓦甕琥珀香新
芻芋魁如拳栗殼赤獻罷地主還相酬東鄰西舍迭賓主老
幼合坐意綢繆山花野葉插巾帽竹筍漆椀兼羹甌酒酣大
笑雜語話跪拜交錯禮數稠或起頓足舞侏儒或坐拍手歌
甌篋傾盆倒榼混醢醬爛熳沾漬方未休兒童跳躍助誼課
執楯逐走同俘囚出門不記舍前路顛倒扶掖迷去畱朝陽

照屋且熟睡官府亦簡少所求寧知宴安含醜毒未耜一變
成戈矛高門大宅化灰燼蓬蒿瓦礫塞道周春燕營巢在林
木深山露宿隨猿猴三年避亂客異縣側身天地如浮漚親
朋阻隔童僕散疏食水飲不自謀有時恂悅夢閭里驚覺五
內攢百憂君家一畫圖稱絕妙鑒別曾遇柯丹丘想應臨榻出
秘府筆意精到世罕儔村歌社舞自真率何用廣樂張公侯
太平氣象忽在眼令我感愴涕淚流近者鄉人來報喜今歲
高下俱有秋豺狼食飽卧窟穴軍師已運招安籌人情自古
共懷土况乃霜雨淒松楸神龜且被豫且困予所弗念天我
尤積薪厝火非遠計誰能獻納陳嘉猷長江波浪接淮泗白
日慘澹騰蛟虬天下農夫總供給隴畝不得安鋤耰市中食
物貴百倍一豕之價過於牛魚鹽菜菓悉賣米官幣束閣若
贅癩朝餐僅了愁夕膳誰復有酒澆其喉循環天運往必復
邪氣斃至不遠瘳此生此景須再覩引領悵望心悠悠

題湘湖圖

君山洞庭隔江水彭蠡無風波浪起明窓曉晴圖畫開興入
湘湖三百里湘江兩岸山縱橫湘湖碧繞越王城越王城荒
陵谷在古樹落日長煙平游子天寒孤棹遠七十二谿飛雪
滿浩歌不見濯纓人沙鶴野猿相對晚湖東雲氣通蓬萊我
欲從之歸去來蛟鼉塞川陸有虎兩臂無翼令心哀

爲啓初門和尚題山水圖

天下名山隨處有畫圖流傳亦良久祇園道人展橫幅觀者
稱誇同一日蒼梧九疑高挿天卷而懷之不盈手巨靈驚呼
盤古怒地軸塊九昆侖剖太陽出海開杳冥蟠冢岷峨大如
斗華軒無人清晝閑恍然置我匡廬間金輪迥出牛女上遠
近羅列千雲鬟江花野竹青錦斑嵌巖斷石蛟鼉顏岡盤谷
轉絕徑路但見湖水迴瓊環白沙洲暖春風起南船掛帆北
船艤吳波不盡芳草外楚岫半入長烟裏夜深小龍行雨歸
宮亭月落彭郎磯旌陽步虛虛老和雜佩散作虹蜺飛百年
塵世真夢寐回首旌旗塞天地舊游何處成渺茫一曲狂歌

數行淚青丘弱水迷方壺武陵桃源今有無瑤臺三島消息
斷安得羽翼歸清都

題趙學士松圖

白塔

趙公拈筆作古松平地躍出二青龍蜿蜒不上霄漢去爽颯
長雷烟雨濃前朝美人鬪草處猶有當時數株樹江亭六月
涼如秋應與此圖相對愁

題李陵見蘇武圖

中原無書紙不乳狐裘蒙茸奈何許老身漢節死生俱地角
天涯見明主金鞍駿馬空故人相看一笑增悲辛悲來風沙
吹上馬河水東流日西下

空一作吾

雪鶴篇贈詹同文

有鶴有鶴丁令威碧玉爲骨玄霜衣層城十二身所依千年
伐毛一度歸洗髓織女黃姑磯瑤臺雪花大十圍食之神爽
肉不肥乘風振羽芳菲菲丹砂結頂燁有輝咳唾璀璨生珠
璣朝遊明星夕大颿騰光躡景超巍巍膝六驂乘虹蜺駢莖
宮仙娥項帝妃鎔雲鍊雨成瓊歲眩晃晝奪扶桑輝離眸閃
爍不可睇回叅攸攸翼縞旂白虎殼鯨良厥腓鸞鷁鳥鴻鶉
鵠翬鷺鸚鵡鵲鷲與鴉局促縮胸潛嶢崎惟有皓鶴從之飛
竦翻夜過東皇畿玲瓏琪樹曼金徽砉然長鳴驚海圻海波
噴作煙霧霏馬銜罔象蹲若鞮鯢鯨天矯相嘘唏銀河腹堅

膠蜃豨王母桃花凍不緋五色石裂女媧謫祝融上訴開九
扉帝命養之青鎖闈賜以沆瀣憐其飢朝朝暮暮朝太微翅
翎披拂天香馥北斗粲爛星依稀翠赧抱日露未晞圓航修
趾逸且頎踰踰蹈舞霍以揮散仙引領空相希嗟哉清峻天
下稀勿歎遼東城郭非桂華宵窪甘露澄味美遠勝商山薇
頡英爲羞堪咀噉比之琅玕亦庶幾盤空硬語去脂韋歌以
贈君君莫譏

贈杜安道

憶昔天兵伐荆楚舳艫蔽江齊萬櫓謹聲激烈似雷霆猛氣
魚休震貔虎拔柵皖城猶俯拾探穴九江無險阻明年大戰

康郎下日月，坎北相吞吐。馮夷蹋浪羣，冰飛巨鼇掉。首三山，
舞雲隨太乙。擁鋒旗，鼉爲豐隆作。靈鼓將軍金甲箭，贊蝟戰
士鐵衣汗流雨。火龍嬉燄絳天衢，燧象厯烟煎。地府鯨鯢旣
剪擻，搶落草木熙陽魚。出谷當時從，臣皆俊良。近待共推徐
與杜，或操陳子之刀鑷。或負伊公之鼎俎，艱難出入矢石下。
鞠躬盡力無摧阻，夙興夜寐事一人。小心不貳，帝臨女只
今四海同車軌，葑菲罔遺遵。往古瓊瑤赤芾遙，鴈行鞍馬祿
食光門戶。天雞一聲金闕啓，龍顏有喜常先覩。顧我愚疎憂
患集，病骨峻嶒蒸溽暑。興來懷舊倚長歌，星星兩鬢絲千縷。
太師誠意伯劉文成公集卷之十四終

太師誠意伯劉文成公集卷之十五

芝田令新陽後學萬里續梓裔孫標男宗燦編

五言律詩

旱天多雨意五首呈石末公

旱天多雨意，雲日氣恒陰。草木焦枯盡，蛟龍伏匿深。移家愁
地蹙，經國恨年侵。已矣商巖叟，無人解作霖。

旱天多雨意，炎夏已清秋。虛牝空蒸鬱，高圓迥獨浮。下田應
脯蚌，深樹且鳴鳩。向夕星河影，稀疏恰近樓。

旱天多雨意，散漫起重陰。漸變峰巒狀，還摘錦繡文。龍應愁
病暍，烏亦念將焚。碧落高無極，人間叫不聞。

旱天多雨意炎燎發洪爐事急徒號梗謀窮漫曝巫王征愆
節制民望失來蕪原隰看如赭哀今鹵掠無

旱天多雨意雲起旋隨風澤氣沉沙白山嵐過野紅乾坤愁
夢裏日月戰塵中漫說生生理如何亦有窮

次韻和石末公旱天多雨意五首

旱天多雨意雲合又還晴苦熱連三伏微涼入五更青山黃
葉遍白水紫烟生旦夕霞標起依稀對赤城

旱天多雨意霞起衆山光日月躔陽道雷霆伏大荒躍淵無
黑蜮在牧有夷羊萬室俱如燬何人尚閔旌

旱天多雨意一望百憂侵海沸羲和日山藏傳說霖南河那
可決北斗不能斟歎息還搔首清商已滿林

旱天多雨意悽惻望鉤陳哀顛何時達愁眉盡日顰乾坤三
島浪歲月雨淮塵莫問和調事嗚呼賦畝人

旱天多雨意陰電繞空湫暴客馮高壘良農死棄丘干戈猶
未息災沴復何尤軫望成衰疾那堪數倚樓

憂懷

傷離驚歲晏引望起愁端落日烟中小孤雲雪外寒浮生無
限恨垂老異鄉看掩淚觀梅蕊中心分外酸

感歎

聞說蕪州破倉皇問故人死生俱可悼語道一何屯北去應

無路南藩自此貧
淒涼轉蓬客
淚盡浙江濱

題鑑湖送別圖

曲岸扁舟艤澄湖
祖帳開雲生
秦帝碣雨暎
越王臺荷氣清
瑤席波光灩玉盃
情深不忍別
欲去更徘徊

次韻和王文明雨中雜興四首

積雨累十日
平湖添半篙
風連箕畢動
雲傍斗牛高
水鶴巢
林木池魚上
野蒿農人愁
餓苧採擷到溪毛

白日迷陰陸
濃雲沒大荒
雨深筠篔簹
潤風度葛衣
涼虎豹歸
林濕魚龍赴
壑長波濤渺
清落悽惻解鳴璫

濕雲看欲薄
陰氣未全收
日月昏昏見
鼃鼃頽頽浮
虛簷騰

盼蠻壤壁湧蜉蝣
幽獨無人問
含情謾上樓

青冥不可見
朱夏已無多
雲木光浮沒
川原氣盪磨
荒蕪一
將略浩汗五湖波
去去滄浪水
君聽鼓柁歌

題太公釣渭圖

璇室羣酣夜
璜溪獨釣時
浮雲看富貴
流水澹鬚眉
偶應非
熊兆尊爲帝
者師軒裳如
固有千載起人思

稽句類

日日隱巖嵒
千崖氣勢豪
溪流婺女闢
山入少微高
危石天
欹側長風谷
怒號干戈方
自此行役敢辭勞

淳安舟中遇雨遣悶二首

謝意集
卷之十五
四
一夜青山雨平明黃濁喧亂流翻地軸高響落雲根鍛羽投
林鳥啼飢抱樹猿羈懷正愁絕感物重銷魂

溪雨細如霧北風長夏寒汗池不赴壑井谷自成湍蘭茝馨
香盡魚龍世界寬斜陽在林樹時復捲蓬看

丙戌歲將赴京師途中送徐明德歸鎮江

疲馬懷空櫪征衣怯路塵那堪遠游子復送欲歸人月滿西
津夜花明北固春論文應有日話別莫悲辛

過南望時守閘不得行

客路三千里舟行二月餘壯顏隨日減衰髮受風疎蔓草須
句國浮雲少吳墟愁心如汶水蕩漾遶青徐

發景州

澹澹夕風作蕭蕭蘆葉鳴林間衆鳥息河上一舟行海近雲
常濕天虛月更清神京看漸近且緩望鄉情

泛海詠霧

海上苦多霧北風吹更長纔交積水氣已翳太陽光淺亂洲
渚色深迷鴻鴈行神姦馮出入君子慎周防

殺氣

殺氣乾坤黑陰氛日月黃已成心曲亂不復髮毛蒼夜哭城
笳裏朝烟野戍傍扶傾無郭李何地尚畊桑

遣興二首

白日下西岑空庭生夕陰郊原過雨色鍾梵隔墻音有感憂
思積無能老病深露從河漢落不覺滿衣襟
月是今宵滿花從昨夜開看花嗟寂寞對月且徘徊白髮添
無數青春去不回莫思人隔世聊樂酒盈盃

四月十二日發揚州

幾見明月滿猶嗟行路難時平耻無用身賤敢偷安天地山
河闊風沙道路寒旅人元有淚不必雍門彈

濟州太白樓

小逕迂行客危樓舍酒星河分洗水碧天倚嶧山青昭代空
文藻斯人竟斷萍登臨無賀老誰與共忘形

送僧家奴叅政赴河東宣慰使二首

雲中形勝地關塞接天長白草連沙漠黃河入晉陽老臣持
節鉞大閫壯金湯昭代思賢佐須公在廟堂
大閫諸藩上元戎朔漠間天低馬邑塞河入鴈門關落日旌
旗靜高風堡障閑旬宣推碩望喜色動龍顏

送人赴德清稅

鏡湖木葉落震澤水波生鳧鴈衝人起笙歌送客行鹽津魚
罟集桑屋繭絲明王稅隨時足吟哦待太平

題釣雪圖

雪暗洲渚白江清蒲柳寒悠揚雙短棹汗漫一魚竿忽憶滄

浪曲因悲行路難蛟鼉正驕恣還爲爾長歎

將曉

愁夢不更續寒天將欲明雪風吹海樹霜月凜江城衰病丹
心在艱虞素髮盈殷勤東注水渺渺若爲情

不寐

不寐月當戶起行風滿天山河青靄裏刁斗白雲邊避世慙
商綺匡時愧魯連徘徊懷往事惻愴感衰年

秋感

老病偏多感宵長晝亦長衣冠方謝暑枕席已驚涼往事鐫
心在新知過眼忘籬邊舊栽菊歲晚爲誰黃

秋興

大淨山月出水寒沙鳥鳴孤燈秋後思短笛夜深情江海空
衰髮乾坤未弭兵清都隔河漢訶禁有開明

晚思

返照吳山外歸雲越水頭寧捐白羽扇却着黑貂裘草暖鳧
鷺渚波香杜若洲艱難愧生事汗漫想扁舟

望孤山作

曉日千山赤寒烟一島青羈心霜下草生態水中萍黃屋迷
襄野蒼梧隔洞庭空將垂老淚灑恨到滄溟

青絲馬

蹀躞青絲馬艱難赤伏符窮陰歲欲暮落日鬼相呼見鴈愁
心裂看天淚眼枯殷勤夜深月還照旅魂孤

十二月一日

耿耿夜不寐源源憂思來歲餘三十日腸定九千回江響風
初發天昏月未開白頭真合得非是楚猿哀

古戍

古戍連山火新城殷地笳九州猶虎豹四海未桑麻天迴雲
垂草江空雪覆沙野梅燒不盡時見兩三花

客路

客路秋風裏扁舟夕照時渚鴻魚腹陣江樹井陘旗衰朽嗟

誰與愚蒙荷

帝慈山中牧羊子歲莫爾相期

逢熊文彥二首

相離已隔世相會豈忘情識面非觀貌知心只記名夕陽荒
野闊秋水大江平往事無勞問空令萬感生

憶昔相逢處湖山錦綉春筦絃喧夾巷花柳隘通津離別人
非故推移物自新愁來重回首涕淚下霑巾

五言長律

錢唐懷古得吳字

澤國繁華地前朝舊此都青山彌百粵白水入三吳艮嶽銷

王氣坤靈肇帝圖兩宮千里恨九子一身孤設險馮天塹偷
安負海隅雲霞行殿起荆棘寢園蕪幣帛敦和議弓刀抑武
夫但聞當宁奏不見立庭呼鬼蜮昭華袞忠良賜屬鏤何勞
問社稷且自作歡娛秔稻來吳會魚龍出具區至尊魏北闕
多士樂西湖鷓首馳文舫龍鱗舞繡襦暖波搖襞積涼月浸
氍毹紫桂秋風老紅蓮曉露濡巨螯擎擁劍香飯漉雕胡蝸
角乾坤大鼇頭氣勢殊秦庭迷指鹿周室嘆瞻烏玉馬違京
輦銅駝擲路衢含容天地廣養育羽毛俱橘柚馳包貢塗泥
賦上腴斷犀埋越棘照乘走階珠弔古江山在懷今歲月逾
鯨鯢空渤海歌詠已唐虞鳴革愁何極羊裘釣不迂征鴻暮

南去回首憶尊鱸

誠意伯文集

誠意伯劉文成公集卷之十六

芝田令新陽後學萬里續梓裔孫標男宗焮編

七言律詩

寄題昇元觀綠筠軒

帶郭軒楹映綠筠八牕瀟灑總宜人
風生密葉蛟龍舞露下寒梢翡翠勻
不待剪裁調律呂若爲惆悵憶伶倫
五城雙闕烟塵隔且傍林巒寄此身

送李子庚之金陵

舍下微波湧碧鱗湖邊草色可憐人
也知使者徵書急莫厭輕舟出郭頻
春酒盈缸清似水時魚帶子白於銀
山桃野杏

能紅紫醉眼相看意自真

欣懷亭二首爲脫因宗道賦

欣懷亭子湖山上山色湖光八面開
恰似崑崙積石圃湧出王母閭
風臺驪龍夜靜擊珠上神女天寒
委佩來何日扁舟一繫纜高躋
絕頂望蓬萊

愛子山亭湖水中雜花修竹合蒙
蘿三春錦繡花迎日十里笙簫竹
度風菰飯炊來勝雪白鯉魚釣得
出波紅浮生無事當爲樂應許閑
人一醉同

送趙元舉之奉化州學正

東風吹雪作春波送客中流發棹
歌酒至莫辭狼籍醉情深

無奈別離何天童山杳嵐光暝
佛手江長海氣多泮水紫芹香可
攬倚看待佩樂菁莪

次韻和退音上人

絕頂浮雲鎖石關曲途危磴阻躋
攀他年甲楯孤臣泣此日齋鍾老
衲閑夜永星河低半樹天清猿鶴
響空山干戈未定歸無處擬結茅
廬積翠間

題王起宗御史江山烟靄圖

繡衣御史乘驄暇貌得江山烟靄
圖日落風雲連紫極天寒波浪隔
蒼梧魚龍縱壑深無底猿鳥歸巢
暝不呼羈旅傷心緣百感可堪回
首憶吾廬

二月三日登樓作

薄寒疎雨集春愁，愁極難禁獨上樓。
何處山中堪採藥，幾時湖上好乘舟。
銜泥客燕聊相傍，泛水浮萍可自由。
見說蘭亭依舊在，于今王謝少風流。

感興

赤城霞氣接天台，上界仙宮此地開。
滄海有波容蜃鱗，石梁無路入莓苔。
當時玉帳耽羅綺，今日絲綸到草萊。
傳語疲氓聊忍待，王師早晚日邊來。

發嵯縣至上虞道中作

磴滑泥深去馬遲，雪殘青嶂不多時。
荒烟蔓草中郎宅，素石清溪烈婦祠。
日落風生臨水樹，野寒雲濕渡江旗。
宣光事業存書史，北望淒涼有所思。

次韻和謙上人秋興

山雲滿地起秋濤，涼葉驚風下九臯。
藥籠空聞收馬渤，絃歌豈復用牛刀。
草間狐兔營三窟，天上龍鰲昧六韜。
周漢中興還有日，載歌赤伏詠嵩高。

聞高郵納款漫成口號

聞道高郵已撤圍，却愁淮甸未全歸。
聖朝雅重懷柔策，諸將當知虜掠非。
堯帝封疆元蕩蕩，世皇功業甚巍巍。
忠臣義士同休戚，縱欲偷安總禍機。

近聞丹詔出天闈 聖主鳴謙下土知
豈意豺狼猶桀黠 未隨干羽格庭墀
四郊多壘忠臣耻 百戰無前壯士規
寄與總戎熊虎將 莫教長媿伐檀詩

再用韻荅嚴衍二上人

負郭無田生事疎 微官已謝不須除
散愁漫入高僧舍 乘興還過野老居
草冷蟲聲悲杼軸 霜餘蕉葉碎緘書
黃花素髮相將暮 獨立淒涼憶往初

又用韻荅嚴上人

中夜登樓望紫微 北辰不動衆星依
由來赤日行黃道 多事

玄雲變白衣 雪下蓬萊三島隔
濤翻滄海萬魚飛 聖君宵旰惟恭已
早晚陽和斡化機

次韻和孟伯真感興詩

避難移家適遠鄉 憂時一夜百回腸
徒聞鈇甲連戎壘 未覩鈎車跨賊墮
不共班超爭食肉 欲尋木羽學休糧
磨崖可勒中興頌 努力諸公佐有唐

妙成觀用何逸林通判韻

我訪仙家溽暑前 青楓綠柳暗晴川
竹根露濕登山屐 沙際鷗迎渡水船
雲氣長留虛白室 丹光直上蔚藍天
純陽道士重來日 爲問蓬萊是那邊

詩意何文集
得胡仲淵書歡喜成詩奉呈石末公兼簡三益軍諮
故人忽寄一封書愁眼還明病亦無風滿高林歸猛虎月涼
古塚散妖狐大廷職貢當遄復戎馬資糧不再輸更喜元侯
契天意良苗得雨應時蘓

次韻和石末公秋日感懷見寄二首

郊原如赭已無秋况復干戈未肯休肉食不知田野事布衣
深爲廟廊憂典章淪落悲芻狗餽餉倭遲想木牛禮樂將軍
今卻穀豺狼滿地待虔劉

秋陰竟日似黃昏夏旱良苗不半存敢望魚雞充醢醢尚期
菘蕪作饗殮烟塵慘澹黃公石雲氣蒼茫紫極垣作檝濟川

須傳說九關虎豹向誰論

重陽日使者持詔用韻柬石末公

中元悲斷羲和報九日歡迎詔使來紫禁羽林分壘壁清秋
辰極照中台願從黃石明三略莫使詩人賦七哀蟻垤牛涔
休沸蕩泰山喬嶽甚崔嵬

夜坐有懷呈石末公

西風白露下清寥岸柳江蒲取次凋諸將旌麾非一統大藩
衣服變三苗雄豪竊據皆屠狗功業興臺總續貂棄馬獨知
懷故櫪天涯涕淚北辰遙

次韻荅石末公傷用三苗之作

誠意文集 卷之十六
周用羗髯功有赫唐通回鶻禍無訾幽歌鄭曲非同調楚服
秦駘實背馳安得着鞭先祖逃趨陪前蹕學姚期扶持 聖
主中興業整頓乾坤去詭隨

石末公家人自台州來以詩問之

委羽山前海水飛赤城霞色亂斜暉過庭且喜諸郎至懷土
休嗟舊業違李晟孤軍終獨捷杜曾百戰竟安歸丈夫事主
心如石去殺勝殘自有機

次韻歲菊

風霜搖落愈傷神黃菊於予意自親遲莫長存君子操淒涼
不厭主人貧天虛沈瀝流清氣月過青冥動細綸此夜空庭

耿相對春花夏葉總埃塵

次韻和石末公歲除送窮之作

五夜雪霜清沍氣三陽玉燭照芳春願聞馴象來林邑復覩
封牛至剡賓川后山祇爭效職淮夷海獠悉歸臣 君王垂
拱明光殿 聖敬如湯日日新

次韻和石末公春晴詩

幽禽嘖嘖語朝陽細綠駸駸入女桑天上深宮調玉燭人間
和氣應勾芒赤眉青犢終何在白馬黃巾莫漫征將帥如林
須發蹤太平功業望蕭張

次韻石末公題桃源巷

詞意作文集
桃花逐水縈紆入不覺清溪路淺深執手問名驚見面論新
話舊各傷心壺漿餽餉殮加璧館穀溫存贈有金似此情懷
良匪惡何嗟歲月去駸尋

再次韻時閏九月九日菊

秋來有菊卽重陽曷問他鄉與故鄉愁見飛蓬垂雪領笑蹇
落葦入霞觴陶時莫訝逢餘閏遣興聊圖不永傷歲晚移根
深記取勿令紅紫間中黃

再用前韻頌菊

天遣幽花駐獨陽移根應自白雲鄉釀成甘谷千年液滿泛
瑤臺自寶觴人老容顏猶可返歲寒霜雪復何傷得時無用

空妖冶愧死姚家宮樣黃

次韻和石末公聞有詔使不至

祈招旦夕動遐心疾首西歸望好音鳳下丹霄雲杳杳魚飛
碧海霧沉沉徒言雨露無私潤誰謂陽和未溥臨何日六師
能電掃周原依舊載馳駸

和石末公冬暖

總謂浮雲解作霖豈期雲氣漫成陰何人奠璧頻瞻仰有客
悲歌歎毒淫項帝權移天曷定神龍用亢海徒深掩身未服
先賢訓向日空懷寸艸心

望江亭

柳拂江亭舊画欄望潮人去地應閑寢園寂寞秋風裏行殿
荒涼野草間白塔盡銷龍虎氣荒城空鎖鳳凰山興亡莫問
前朝事江水東流去不還

發紹興至蕭山

落日牛羊下綠坡微風短檝拂晴莎窮愁白髮真相得悲感
青春最苦多水暖菰蒲沙鳥集月明洲渚榜人歌此時忽漫
思身世奈爾桃花滿眼何

宿蠟燭菴俊上人房

城外春江動客愁江邊細草綠悠悠還將短髮臨岐路畏向
東風憶舊游斜日遠天歸鴈急薄寒孤館落花稠青燈不放

還鄉夢一夜腸回一萬周

二月七日夜泊許村遇雨

漫喜晴天出北門還愁急雨送黃昏山風度水喧林麓野樹
翻雲動石根宿麥已隨江草爛新泉休共井泥渾魚龍浩漫
滄溟闊澤畔誰招楚客魂

嘉興寄王昌言學正

去年相別鴈來初今日相思柳拂渠對酒放歌難再得登高
作賦近何如黃華燁燁輕煙裏碧草油油小雨餘欲棹扁舟
尋逸少爲愁妨寫換鵝書

感懷二首

詞意何文集
新晴楊柳散春絲長路行人有所思愁上容顏青鏡識寒生
亭館落花知高雲送雨來無定獨鳥驚風去自遲悶對亭前
紫荆樹同根那得却相離

不到西州又十年青山白水獨依然徒聞雞狗供輸盡無那
干戈迤邐延天上九霄空玉燭人間萬井共貪泉草中攫取
雲中送坐待連茹紫闥邊

寄臺郎張質夫

春愁忽得故人書喜極成悲淚滿裾冀野鴛鴦虛伯樂魯門
鐘鼓駭爰居全家蕩析飢寒切病骨支離志慮疎敢以浮名
誤知己緘辭寫意愧何如

水西寺東樓曉起聞鶯

日上高城柳影齊風軒臨水看鶯啼初來木杪鳴相應稍入
花間聽却迷芳草自深句踐國行人猶隔禦見溪思家每恨
無輕翼可對鸞華不惜悽

茶園別朱伯言郭公葵

細水吹烟送客舟離情恰似水東流此時對酒難爲樂何處
尋春可縱游去雨來雲天渺渺輕蜂亂蝶日悠悠絕憐短髮
無聊賴一夜如絲白滿頭

二月二十三日自黃岡還杭途中作

日照江邊春樹林繁花亂葉感人心花間蛺蝶漫多事葉底

杜鵑非好音舉目山川成皓首側身天地一沾襟解憂惟有
尊中酒疾病年來已厭斟

晚泊海寧州舟中作

春霧今宵氣稍清空江一舸客心驚東流濁浪衝山動西望
長庚似月明不有龔黃爲郡縣徒令耒耜化戈兵溥天何處
非王土無地安身愧此生

憂懷

羣盜縱橫半九州干戈滿目幾時休官曹各有營身計將帥
何曾爲國謀猛虎封狼安荐食農夫田父困誅求抑強扶弱
須天討可惟無人借箸籌

春興七首

柳暖花融草滿汀日酣烟淡麥青青枝間好鳥鳴求友水底
寒魚陟負萍異縣光陰空荏苒故鄉蛇豕尚羶腥感時對景
情何極悼往悲來總涕零

忽聽屋角鬧晨鳩起看園林綠漸稠小雨霏霏涵日過新泉
細細入河流殘花斷柳虛歸計遠水他山聚客愁鴻鴈南飛
限蒼嶺傷心何處問松楸

於越山城控海壖春風回首忽經年憂時望月青宵迥懷土
登樓白髮鮮江上波濤來渺渺雲中鴻鵠去翩翩暮寒細雨
餘花落夢遶天涯到日邊

會稽南鎮夏王封蔽日騰空紫翠重陰洞烟霞輝草木古祠
風雨出蛟龍玄夷此日歸何處玉簡他年豈再逢安得普天
休戰伐不令竹箭困輸供

卧龍山奠越王都羣水南來入鏡湖苦性桑田非舊跡還驚
雉堞是新圖白波翠靄浮天際綠樹青莎到海隅便欲投身
歸釣艇不知何處有蓴鱸

深春積雨感年芳暮館輕寒透客裳翠柳條柔先改色紫蘭
花冷不飄香山中虎豹人烟少海上樓臺蜃氣長燕子新來
畏沾濕一雙相對立空梁

憶昔江南未起兵吳山越水共知名蘋萍日暖遊魚出桃李
風和乳燕鳴紫陌塵埃嘶步景画船歌管列傾城于今征戍
誅求盡翻對鶯花百感生

雨中遣懷

青春苦寒雨太多野水極日似秋波湖上芳草生已遍山中
美人愁奈何思家無計鑿荆棘避地只恐觸蛟鼉落花零亂
晚風起坐看城頭烏尾訛

送岳季堅入計籌山

陽羨先生故將孫拂衣高蹈入玄門甕盈五粒松花酒食行
千年枸杞根自得詩篇畱客誦頻來猿鳥識人言浮雲富貴
非吾愿此意陶公可與論

爲賈性之題山水圖

不見唐朝王右丞世間画史少知名何人貌得烟雨意靜聽
如聞風水聲遠岫帶雲纔隱約斜陽照樹却分明清泉素石
堪乘興欲買扁舟過此生

題雪竹圖

雪壓江邊修竹林沅湘晚色起愁陰川光蕩漾空清澗山氣
玲瓏太白深未得稍雲邀鳳宿可能映水學龍吟無人谷裏
吹春律直節虛中恐不禁

題修竹圖

九疑山下湘江畔多少篔簹覆碧湍自有清陰堪解慍也能

結實待棲鸞濛濛暖翠晨烟合頰頰明珠夕露溥長日焚香
對圖画青冥風雨共凄寒

題画蒲萄卷子

西域蒲萄也自奇画圖驚見墨淋漓迎風翠羽幡幡動帶露
玄珠纂纂垂此日散愁思釀酒幾回病渴想如飴春牕隱几
成幽夢應共張騫到郅支

蕭山山行

積雨今朝天氣佳山亭曉色上林花未須汗漫思身世且可
逍遙翫物華偶值斷橋妨去路却隨修竹到隣家籬邊野鴨
驚人過撥刺飛鳴落遠沙

蕭山任氏山堂

新堂結構倚巖阿地僻無譁樂事多日上黃鸝鳴翠竹雨餘
紅鯉躍清波消除暑氣憑松栢舒卷烟嵐任薜蘿珍重主人
能愛客衰顏聊復爲君醜

以紈扇贈奎上人并寄以詩

新裁紈扇如圓月寄與靈峰奎上人不共青蒲爭巧拙好將
白氎伴清新薰心炎暑誰能敵應手涼風自有神莫怨秋來
藏篋笥明年朱夏更相親

靈峰寺棲雲樓

靈峰之中樓倚山山雲日夕棲其間九霄雨露隨高下六月

風雷送往還青嶂曉光浮藻梲銀河夜氣濕松關天台向上
無多路鷲嶺烟霞此可攀

題瑞上人山水圖

上人性僻耽山水應是王維第二身蘭渚流觴新到越藍田
別業舊通秦驅馳翰墨廻龍虎簸弄風雷感鬼神羈旅相逢
聊自慰莫思天地有烟塵

普濟寺遣懷

江上西風一葉黃莎雞絡緯滿叢篁物華乘興看都好時序
逢愁速不妨露下星河光瀲灩月明巖谷氣清涼願聞四海
銷兵甲早種梧桐待鳳凰

詞意什文集 卷之十六
崇福寺儔上人看山樓

爲愛山中世事疎
看山終日坐茅廬
林花澗草香無際
翠壁丹崖錦不如
禹穴風雷翻石鶴
耶溪波浪動金魚
此時應寤幽棲樂
底用凌雲獻子虛

宗上人溪山亭

湖上清溪溪上山
山亭結構俯人寰
窻中樹色宜晴雨
門外灘聲自往還
鍊藥井寒玄鶴逝
采蓮舟去碧波閑
春蘭秋桂年年好
憔悴風塵漫厚顏

題水墨蓼花草蟲

爲愛江頭紅蓼花
秋來獨作草蟲家
尋香粉蝶應隨夢
采蜜

黃蜂不趁衙絡緯
語殘涼露滴
蜻蜓立困晚風斜
西圖水墨驚初見
却似扁舟過赤沙

題山水圖爲寶林衍上人作

雨過秋山日欲曛
白雲如雪擁山根
高松浥露和烟冷
迸水穿沙出谷渾
擬向蘿陰綠石徑
却尋花片入桃源
畫圖應有通神處
他日相從子細論

次韻和新羅嚴上人秋日見寄二首

露冷風清木葉疎
蓼花蕩草沒階除
子雲詞賦空投閣
仲蔚蓬蒿漫索居
羣盜只今齊得意
故鄉從此遂無書
鏡中短髮非松柏
歲晚看看不似初

謝意何人集
愛汝精藍抱翠微青松綠竹共依依龜臺落日明霞綺鰻井
寒潮長石衣銀杏子成邊鴈到木犀花發野鷺飛鍾殘永夜
禪心定一任秋蟲促杼機

重用韻荅巖上人

坐見風霜百草疎却憐光景漸消除萍蓬飄蕩三年客松菊
荒涼五畝居陋巷蒼苔封蟻垤空庭黃葉帶蟲書江楓恰似
知人意強學芳菲二月初

江水東流西日微閑身不繫獨何依塵埃爽颯枯蓬鬢霜露
淒涼破衲衣百粵雨餘山翠合三韓雲淨海青飛滄漠自古
通天漢夢繞黃姑織女機

再用韻荅巖衍二上人

厚祿故人音問疎天官不擬介推除莫思浮世塵埃事好共
深山木石居月滿高樓畱客話燈明寒榻課兒書城頭鼓角
沉沉夜腸斷鄉關入夢初

蔓草萋迷野色微嗷嗷鳴鴈欲誰依殘花露淡胭脂靨落木
霜凋薜荔衣萬國舊聞車軌一九州今見劫塵飛總戎安得
英雄將不放龍蛇起殺機

復用韻荅巖上人

閉門無事往來疎窻外從他草不除食肉已忘三月味謀身
欲去九夷居人情自古懷鄉土天下何時罷羽書莫向西風

苦惆悵白雲流水只如初

西風吹樹夕陽微
斥鷃鷓鴣各有依
幕府三年雙短髮
鄉關千里一沾衣
江淮渺渺人烟少
梁楚茫茫鬼燐飛
誅暴保民黃石略
將軍莫自失戎機

仍用韻酬衍上人

多愁祇覺世情疎
愁極憑誰與破除
江海烟塵羈客淚
雲山桑梓別人居
高風斷鴈惟將恨
衰草殘螢不照書
世亂弓刀方有用
休誇新句逼黃初

歲暮天寒生意微
空林鳥雀自相依
有情霜葉欺花貌
無用風荷象客衣
西塞鼓鞞山岳震
東郊羽檄海波飛
傳聞有詔

頌南服早晚陽和斡化機

又用前韻

樹頭寒月影扶疎
天上清霜下玉除
紫塞風高鴻失路
碧梧枝冷鵲移居
虎頭曠日糜倉粟
牛腹中宵詫帛書
見說抱關堪避世
稗官猶可學虞初

西風吹面雨霏微
片片浮雲水上依
鴻鴈羣翔營口實
鳧鷖對立惜毛衣
關河慘烈時將晚
原野蕭條葉自飛
慚愧江湖一萍梗
厭聽咿軋響隣機

題寒林圖

搖落江邊秋樹林
淒涼久客二毛侵
藤蘿歲晚龍蛇死
叢薄

天寒虎豹深流木斜陽人遠近青烟白草鴈飛沉桂花自在
山中發悵望西風起夕陰

題訪隱圖

忽憶山中陶隱居杖藜衝曉謁茅廬林花浥露紅無比澗草
含烟綠有餘金鼎丹光纏日月銀河流水到壻除松間白鶴
通人語長向瑤臺寄遠書

宿賈性之市隱

今年冬雨不作雪屋頭鳥聲渾似春絕憐草色綠鋪地可愛
梅花白照人時物已迎新歲換交情空向異鄉親忽思昨夜
殘燈裏錯認還家夢是真

題陸放翁湖上詩後

放浪江湖一老翁若耶溪上幾春風門前流水斜還直籬外
閑花白復紅甚欲賦詩追杜子也能縱酒學陶公細看墨蹟
成懷古歎息他鄉類斷蓬

次韻和孟伯真感興四首

五載江淮百戰場乾坤舉目總堪傷已聞盜賊多於蟻無奈
官軍暴似狼綠水青山人寂寂長烟蔓草日荒荒弟兄零落
音書絕腸斷春風一鴈行

無用文章豈療飢勞生筋骨已支離窮愁杜甫家何在落魄
陳平計未奇草澤狐狸三窟固江湖波浪一帆危故園春色

年年到綠葉紅花好爲誰
平時盜賊起成雲厚祿能忘愧庶民樽俎自高廊廟策經綸
不用草茅人思家遠道風塵惡爭食空山虎豹嗔莫怪洛陽
年少客持書痛哭向楓宸
多事繁花白暎紅無愁細草綠浮空春秋迭代人先老天地
生成意不窮鳳鳥長辭西嶺樹鯨魚自起北溟風幾時學得
玄真子箬笠蓑衣一短篷

次韻張德平見寄

漠漠長烟野色昏霏霏細雨濕衡門乾坤象緯尋常轉江海
波濤日夜翻賈誼奏書哀自哭屈原心事苦誰論近逢使者

徵遺逸說道巖廊納讜言

題承天觀

吳山頂上承天觀玉牒金符鎮地靈百尺樓臺依斗極九霄
風露出牕櫺江聲洶湧蛟龍闕雲氣虛無翡翠屏見說蓬萊
恰相對仙凡只在隔滄溟

感興三首

病骨愁寒憶見春及觀春色却愁人轉添細草當門徑不惜
穠華委路塵去國杜鵑紅淚盡傷時庾信白頭新風波滿地
鷓鴣鳥相趁銜魚飽一身

二月江南雪片飛吳山寒色動征衣莫尋花徑防泥滑且掩

衡門待日晞弱柳先舒應自損螿蟲已出更安歸乾坤處處
旌旗滿肉食何人問采薇

春院微風栢葉垂朝寒坐看雀爭枝娟娟墜雨拋蒼蘚點點
輕花赴綠池景物關情悲自老江山滿目惜時危長生應有
真仙訣漫把黃金駐黑髭

可歎

風雨瀟瀟聽曉雞忽思世事一悲悽當時重禁藏矛戟今日
呼令學鼓鞞未見爭鋒曾奏捷徒聞却走不先迷劫灰日夜
飛相逐隨處空林有燕棲

柯橋靈秘寺卽景贈基上人

盡日陰陰風墜花樓前溝水發芹芽青春院宇僧房好白晝
豺狼客路賒對坐蝦鬚迴舞燕出門鷗尾立飢鴉相期握手
何時再五月芙蓉隘若耶

次韻和石末元帥見贈二首

雨過前溪曉色新山城草木靜埃塵殊方負固猶蝸角此地
偷安賴虎臣高閣綠蘿相對晚西闌紅藥不勝春誰憐衰病
兼疎拙漂泊東西一旅人

元戎玉帳擁旌麾武略文韜並出奇構厦可堪無大匠安邦
曾見活危棋此時山斗歸民望他日龍髯簡帝思我輩迂狂
垂世務趨風執御更何疑

雨中寄季山甫二首

山雨隨風去復來南明晚色動樓臺猶憐仗節中郎在不見
乘槎使者迴感興詩成聊自遣忘憂花好爲誰開偏嫌近水
多螻蝻永夜喧呼聒夢回

長夜雨多泥沒車白日閉門人跡疎階下水衣看上壁庭前
簷溜欲成渠閑花自發無勞種蔓草從生不遣鋤想見幽棲
張仲蔚蓬蒿如樹塞園廬

五月二十九日喜雨奉賀石末元帥

使君設醮天皇格道士陳章玉女開遂遣赤松來作雨更教
玄武下乘雷涼飈細拂花間入潤色新從草際回豈但農夫

堪一飽野人亦有酒盈盃

用前喜雨韻寄呈石末元帥時戍卒有不軌謀蓄而未
發公治之以意卒遂返正故發之以言且并志祈雨有
應也

將軍渡水流漸合太守彎弧巨石開但覺誠心通日月不知
生意在風雷思蓐未許歸張翰結草終當獲杜回可惟疎狂
謫仙子兼旬浪飲六千杯

題紫虛觀用周伯溫韻

少微山直太微宮山下樓臺起半空丹井石牀纏地絡瓊牕
翠戶出天風傳聞仙子常時到應是神霄有路通會待九秋

明月夜高吹鐵笛上青葱

題紫虛道士晚翠樓

晚翠樓子好溪南溪山四圍開蔚藍微陰草色盡平地落日
木杪生浮嵐巖畔竹柏密先暝池中芰荷香欲酣聞說仙人
徐泰定騎鸞到此每停驂

葉叔安南溪草堂卽事

溪上草堂盈十尋疎楊密竹各成陰綠烟繞舍桑畦靜白水
當門稻遂深過雨忽翻金碧影涼蜩亂發管絃音此時不省
愁何在坐到鴉棲月滿林

妙成觀北亭用何逸林韻

最愛雲山滿目前更憐亭榭俯清川草深林藹迷樵徑花落
巖霏點客船碧澗金芝新出地丹崖石穴舊通天神仙應在
樓頭上翠羽霓旌下日邊

以梨餉石末公侑之以詩

山人見餉含消實青紫相排箇箇圓共道解煩同絳雪也知
止渴勝甘泉種從漢武樊川得名並張公大谷傳珍重使君
方閑雨急須走送滌熬煎

遣悶柬石末公

綠楊落盡白楊枯坐石徒令歲月徂尚想藩臣知忠盜豈期
驛使似投巫當時秔稻通遼海今日風濤隔具區豺獺可堪

專節鉞衣冠何以拔泥塗

次韻和石末公中秋不見月詩

一年明月中秋好萬里長空此夜陰
雨暈青燈昏遠思蟲鳴黃葉亂鄉心
見愁盜賊氛猶惡莫惟乾坤氣尚濠
便欲捫蘿上天柱九霄風露恐難禁

次韻和石末公七夕詩

天上傳聞會兩星清秋夜色湛玄冥
蚌胎隱見銀蟾窟鵲翼高低玉女輶
一水經年纔邂逅七襄終日豈神靈
勞生厭事惟思睡獨卧無心覲帝青

再和倒用前韻

天官垂象煥空青會合徒聞帝子靈
三武夜開千石簾兩旗晨轍七香輶
房帷瓜果紛祠祀霄漢雲霓隔晦冥
惆悵多憂江海客登樓獨自看台星

病足戲呈石末公

旻天容我作支離病瘧纔除足就羸
跬步不妨猶似鼈蹕行那得更憐夔
抱珎獻楚何堪再斫樹收龐亦未遲
塞叟于今知匪禍周雞從此免爲犧

遣悶呈石末公

公庭春樹秋重綠但見鳴鳩日日鳴
不雨正當三伏熱看雲無奈百憂生
草間羣盜俱糜爵天下何人尚力耕
漢法幾時

還再復白頭猶得詠昇平

庭前萱草花落已久至秋復開感而作詩東石末公
露下蛩鳴寒氣催蒹葭葉響鴈歸來鬢毛已爲憂生白護草
何須晚更開嫋嫋悲風吹落木炎炎赤日走黃埃干戈未了
仍飢饉人事天時總可哀

次韻和石末公閔雨詩

騰雲降雨指龍功况復山川祭秩隆豈意愆陽爲沴氣忽過
炎夏到秋風祈年勞酒儀徒備登穀嘗新望已空享祀未應
無報稱可堪不殺待時豐

再用韻

旱魃爲妖殄歲功田疇龜折徧汗隆無多過雨纔鳴葉不定
行雲又逐風蔓草荒烟秋社迥黃沙白葦暮江空愁來漫憶
淳于祝却愧靈祇享祀豐

妙成觀道士劉雲心挽詩

少微星下葬神仙白玉樓中迂翠輦弟子焚香玄鶴逝天官
蕭駕紫鸞翩金丹縹緲空山月鉄笛淒涼遠樹烟溪上故人
如見問碧桃花裏過年年

次韻和石末公聞海上使命之作因念西州愴然有感

二首

巫閭析木天空濶桐栢終南水亂流邑里蕭條無吠狗田疇

燕穢少耕牛萋萋蔓草隨人遠
淡淡殘陽向客留
遲莫飄零偏感舊
幾迴垂淚睇神州

弟子輿尸漫有師
圯橋誰共老人期
龍魚並出應難識
檣櫓無庸幸見遺
每上樓臺瞻北極
願聞波浪帖南陲
吳山越水元相接
莫更中流下鐵椎

驛傳杭台消息石末公有詩見寄次韻奉和并寓悲感

二首

被讒去國終思楚
厚貌深情漫劇秦
未識龐萌真老賊
妄期侯景作忠臣
池魚幕燕依棲淺
軒鶴冠猴寵渥新
何處荃蘭不蕭艾
種蔬猶得養閑身

喪亂如川未有涯
悲風滿地是蟲沙
衰遲兩臂從生柳
疾病雙眸但隕花
暗蛩寒蟬秋色老
丹楓紫菊夕陽斜
頗聞四國思郇伯
尚想詩人賦木瓜

再次韻二首

南州昔日稱三楚
西國今聞又一秦
有爵與縻亡命賊
無才深媿具官臣
青冥鸞鳳風塵隔
画省貔貅服色新
悵望令人憶李郭
誰能匡濟想捐身

深秋蔓草接天涯
極目飛鴻沒遠沙
綠水青山長送目
江蘭岸蓼各生花
風來西塞雲陰合
濤落東溟蜃氣斜
歎息笙歌舊亭館
壞垣叢棘老王瓜

次韻和石末公感興見寄

使君學術似文翁奕世流芳緝武功赤芾青衿來燕喜黃童
白叟望車攻筆端波瀾翻三峽旗尾龍蛇動八風慚愧謫才
多謬誤憂時獨有此心同

次韻和石末公無題之作

秋風嫋嫋作商音落葉枯荻日夜深已爲抵烏投白壁徒勞
點鐵冀黃金軒轅未必迷襄野夸父終當死鄧林笑撚東籬
菊花蓋天寒歲晚爾知心

次韻和石末公九日見寄

去年見鴈思鄉里今歲還鄉鴈不來此地淒涼逢九日何時

清切觀三台菅茅夜冷蛩蟹急禾黍秋空鳥雀哀辟難無勞
效桓景巢居隨處壓崔嵬

陳太初充兵應點作詩戲之

無僕無臺一老儒數間茅屋近通衢忽聞巷長呼排甲急換
戎裝出荷戈就列敢辭長拱立隨羣獨作沒堦趨西風鼓角
秋宵永明日青髯是白鬚

次韻和石末公開讀有感

百年萬國奉王正相業臺綱屬老成山海若時共職貢郊原
何處有戈兵廟謨可使歸權倖祖訓由來重變更欲叫天關
無羽翼拊心長嘆不勝情

秋夕有感柬石末公

獨立西風聞莫蟬
起看時物愴流年
星臨野樹輝輝動
露出庭莎的的圓
無奈素絲侵綠髮
却嫌黃菊似金錢
烟塵滿眼難回首
惆悵高堂坐細氈

次韻和石末公自訟之作

騷駉驩譟不服驂
王良造父亦難堪
羨君名重中台上
勳業終光北斗南
露井淒風殘綠少
霜林落日亂紅酣
侯封職在同藩屏
班爵無勞阿伯男

立冬日作

忽見桃花出小紅
因驚十月起溫風
歲功不得歸顛項
冬令何堪付祝融
未有星辰能好雨
轉添雲氣漫成虹
蝦蟆蛺蝶偏如意
旦夕蜚鳴白露叢

丙申歲十月還鄉作七首

溪上寒山淡落暉
溪邊風送客帆歸
故家文物今何在
平世人民半已非
華髮老翁啼進酒
蓬頭稚子笑牽衣
自嗟薄質行衰朽
未覩明廷賦采薇

風急霜飛天地寒
草黃木落水泉乾
千村亂後荒榛滿
孤客歸來技淚看
野宿狐狸鳴戶外
巢居烟火出雲端
黍苗處處思陰雨
玉粲詩成損肺肝

故園梅蕊依時發
異縣歸人却見悲
花自別來難獨立
人今

老去復何之未能荷鍾除叢棘且可隨方着短籬等待薰風
暄暖後枝間看取實離離

手種庭前安石榴開花結子到深秋可憐枝葉從人折尚有
根株爲客畱枳枸悲風吹白日若華高影隔青丘壤垣蟋蟀
知離恨長夜淒涼弔獨愁

舍北草池寒已枯草中時復見菰蒲檻泉窟沸無畱鮒弱藻
蒙茸不繫鳧綠葉紅花空代謝春蛙秋蚓任喧呼窺臨最憶
琴高鯉騰駕風雷定有無

小舟衝雨清溪上雨密溪深宿霧昏游子到家無舊物故人
畱客歎空尊荒畦蔓草纏蒿草落日青猿叫白猿語罷不須

還秉燭耳聞目見總銷魂

五載辭家未卜歸歸來如客鬢如絲親知過眼還成夢事勢
傷心不可思且喜松楸仍舊日莫嗟閭井異前時修文偃武
君王意鑄甲銷戈會有期

冬至日泊舟戈溪

日薄雲陰雪在山野寒溪靜客舟還乾坤簸蕩逾三載風俗
乖張似百蠻廢井衰蕪霜後白空村喬木曉餘殷獨憐節序
逢冬至不得安棲學閉關

次韻和石末公紅樹詩

紅樹漫山駐歲華玄冬驚見眼生花井陘旗幟軍容盛汴水

詞意何文集
帆檣御氣賒春草淒迷金谷障夕陽照灼赤城霞靡萍丹木
扶桑裏惆悵誰乘博望槎

次韻和石末公元夜之作

八表流雲澄夜色九霄華月動春城條風細細吹旗影香靄
微微引漏聲河漢虹橋應斷絕滄溟鼇足漫崢嶸愁來更聽
漁陽操獨倚闌干坐到明

石末公再賦元夕見寄用韻酬之

東方月出魚龍窟北極雲開虎豹關渤海青丘金作水崑崙
赤岸玉爲山風光豈減常時好燈火嗟逢此夜慳聽盡殘鐘
成不寐那無飛羽入玄間

丁酉七月十四夜望月仍蝕且旣而司天報亦不至感

去年作此寄石末公

山城望月中元夜天運循環四序周顧兔又從銀漢滅磔墓
空抱玉川憂清臺視袞當箕尾仙使乘槎隔斗牛安得寄書
憑去燕爲言桂樹不勝秋

題烟波泛舟圖

舊遊憶鼓湘湖櫂日淨風微江練平小艇曲穿花底出遊魚
相伴鏡中行別來漫想心徒切画裏重看眼亦明素石蒼松
是何處願從巢父濯冠纓

爲王彥和賦槐堂

晉公庭上三槐樹千載流傳是德符今日耳孫思繼述昔年
手澤歎荒蕪當窗欲看屯雲葉夾徑先栽帶雨株會見枝頭
金粟葢秋風吹送上天衢

社日偶成奉呈石末公

昔聞同社燕雞豚今見操戈競一殮松栢空壇飢鼠出枌榆
落日亂鴉喧地連吳會嗟何蹙民是周餘不半存疎懶渾愁
聞世事治聾有酒漫盈尊

次韻和林彥文劉山驛作詩

青泥九折度危峰翠木千章集遠風欲爲流離安堡障寧辭
辛苦涉蒿蓬梧桐葉落無棲鳳荆棘枝寒有怨鴻旦夕升虛

聊望楚何時重賦定方中

次韻和余嘉賓御史見寄

二紀相思欲奮飛百年心事苦相違風塵跋涉容顏改豺虎
縱橫信使稀忽枉緘書如見面不勝悲喜却沾衣有懷欲語
無由寫驄馬天涯幾日歸

次韻和石末公月蝕見寄

涼氣開秋桂未花青天見月漫咨嗟玉毫撲撈此中兔金背
熒煌何處蟄百鍊精銅纔照膽連城白璧底生瑕誰能鼓劍
披氛祲莫遣東郊馬歎沙

卽事有感呈石末公

誠意伯文集 卷之十六
葵藿傾心嚮大明參商瑣瑣只尋兵蛾眉欲擅三千寵魚翼
難通九萬程貝錦笙簧鳴鳥瑞明珠琢玉泰山輕兩階干羽
聞來格分北猶勞 聖主情

次韻和石末公感懷之作

鳳去深林鶯在庭西風回首故山青杞人岌岌憂將殞楚國
茫茫醉不醒自覺艱虞多錯午誰憐耗數祝寧丁金芝玉蕨
廿如蜜歲晚吾必 重五經

聞盜過界首季君山甫亦蒙訪及以詩唁之

妖星何故犯奎躔鶴上雲霄鯉入淵寇退喜聞曾子反書焚
尚賴伏生傳蠶酸併與青氈去瓜苦空餘綠蔓牽慚愧杜郊

湯博士白鹽赤米數相憐

次韻和石末公中秋翫月

一年二六團圓月此夜光輝獨耐看銀漢波濤三島接玉京
風露九霄寒方欣酷暑隨時去只恐清商促歲闌更上南樓
瞻北極那無鴻鴈報平安

次韻和十六夜月

纔圓又缺中天月猶自寒光媚老蟾承露仙人珠落掌別風
樓觀雪生簷玉階桂影駸駸薄金井苔花漸漸添坐久城頭
聞夜柝牢愁清興苦相兼

再次韻

永夜涼風吹碧落深秋白露洗明蟾金波灩灩將流瓦玉礫
熒熒恰近簷貝闕寒生魚腦滅龍宮氣肅蚌胎漆從軍不廢
篇章事倚賴元侯智勇兼

次韻和劉宗保秋懷二首

眼見賓鴻去復回可堪雲霧隔瑤臺黃花自在山中發青鳥
何由海上來墻角蟲號瓜蔓索樹頭禽嚇栗房開涼蟾照幕
還清夜慚愧千村野哭哀

蛩螿啼露作悲愁鵬鴉搏風樂素秋莫訝繫匏長不食亦知
神劍解相求翰林白髮三千丈吏部回腸一萬周借問何如
青白眼酣歌竟日爲身謀

次韻和石末公九日無菊詩

籬菊無花冷夕陽西風空送鴈還鄉已妨少昊頒時令更阻
淵明泛酒觴生意循環深自識年華逝水去誰傷愁來最愛
霜中葉滿眼殷紅間淺黃

野行偶見紅樹悵然有感呈石末公

紅樹傷心夕照前漫山映水爲誰妍樹當搖落人尤惜人自
憂愁樹不憐九譯未通青鳥使四郊猶漲綠林烟野夫病足
思休息藉草棲櫓擬晏眠

次韻和石末公紅樹詩

岸柳江蒲總戚施相林辛苦擢金支虞人詫見炎官傘候騎

誠意文集
卷之十六
訛傳漢將旗照水熒煌空銜貌因風飄落竟從誰應慙若木
生賜谷長駐駿烏燭崦嵫

次韻和石末公悲紅樹二首

乾坤何處非王土稂莠誰令滿大田未掃綠林千嶂裏還看
紅樹九秋前吳宮露冷蟬何在漢苑風悲鶴自憐却羨魯陽
功德盛揮戈回日至今傳
霜與秋林作錦幃一朝霜重却全稀坐看絕豔成塵土應寤
浮華是禍機驚鵲月明難自定窮猿歲暮欲何歸猶憐有客
期歡賞太息斯須志願違

詔書到日喜雨呈石末公

將軍鐵馬高秋出使者樓船渤海來甘雨恰隨天詔下凍雲
應與地圖開枯黃背日紛紛落細綠迎春苒苒回悵望山中
多病客坐看烏鵲遶庭梅

感事呈石末公

前飛鷓鴣後駕鵝天闊風高奈汝何不羨焦頭居上客空憐
舐痔得車多深山虎豹來城市落日鼙鼙出薜蘿薇蕨可羹
魚可膾白雲長自在巖阿

贈西巖道元和尚

西巖寺裏雲巢子不到人間幾十年杖錫野猿迎路側談經
山鬼拜燈前塵飛劫火青春夢雪滿長松白日眠近得淵明

入蓮社興來時復有詩篇

題王伯衡縣尹桑陰圖

漁陽太守之官後種得桑陰比召棠麥隴風微雲委甸茅簷
日暖雪盈筐倉庚過去青枝動戴勝飛來紫椹香千載先生
同此意爲君重賦兩岐章

次韻和石末公漫興見寄二首

王侯古有興屠狗郎吏今無善牧羊青海風波騰罔象紫霄
氛祲翳搖光江寒逝水東流急天遠冥鴻北去長莫笑烏鸛
惡毛羽翻飛齊得造鷓行

濟世何人希管樂隱居無處覓求羊扶桑未換暘烏彩腐草
猶爭爝火光百載承平戎馬佚七年戰伐艾菅長長沙遷客
能流涕一日須垂一萬行

聞鳩鳴有感呈石末公

郊原過雨東作始枝上鶉鳩鳴可憐此地巢居猶葺壘他鄉
去子望歸田匡時勢異民思漢憂國心隨鴈到燕逝水自流
人自老倚楹長憶至元年

戲和石末公催太初画山水之作

春蠶吐絲作成繭辛苦爲人身上衣画史等閑揮彩筆女工
顛顛倚空機高堂素壁峰巒出暮雨朝雲夢寐歸可憐唐朝
杜陵老瘦妻短褐有光輝

和石末公冬暖

世亂干戈日夜尋，
可堪災沴又相侵。
烟霞出地皆成礙，
雷電飛時肯作霖。
祝錫漫勞遵故事，
問牛誰復軫憂心。
小蟲未寤年光晚，
猶抱枯荻學苦吟。

雨中呈石末公

去年三冬暖不雨，
今年孟春寒有餘。
大雲垂垂壓宇宙，
密雪袞袞飄庭除。
安排白水與泛舸，
醞釀青泥容沒車。
辛苦陌頭楊柳樹，
含顰等待太陽舒。

和石末公見示育字韻

長想天涯皆內地，
忍看閩外卽他鄉。
扶生可惜鑿無緩，
救死寧堪鬼在盲。
郡縣誅求應到骨，
乾坤戰伐徧成瘡。
遼東華表雲間鶴，
相見相思總斷腸。

次李子庚韻

風落餘花春事非，
愁心烟雨共霏霏。
溪雲不作從龍起，
山石何須學燕飛。
籬下舊存彭澤菊，
林間新長首陽薇。
夜闌忽漫聞啼鳥，
腸斷天涯信使稀。

早春遣懷

正月餘寒未放春，
漫空飛雪舞隨人。
新年對客情何限，
濁酒於予意獨親。
澗底流泉渾似玉，
門前細草總成茵。
鶴歸自愛山能靜，
豹隱方知霧有神。

雨中遣悶

雨漬愁雲重不飛
山蒸冷霧襲人衣
亦知屏翳空多事
只恐羲和失所歸
歲晏波濤東逝急
天寒鴻鴈北來稀
殘燈永夜清無焰
坐聽飢猿響翠微

聞猿有感

猿響秋山夜向闌
白雲如雪擁林端
鍾磬楚奏難成調
蔡琰胡笳欲罷彈
澤畔離騷餘怨恨
巴東涕淚想沉瀾
唯應華表歸來鶴
明月清風共歲寒

漫成

老去知心更有誰
愁將短髮對花枝
花殘更發新春葉
髮白空垂滿面絲
縱酒放歌憐往日
倚闌聽鴈立多時
若爲化得搏風翮
汗漫東西信所之

感興

百年彊半已無能
愁入膏肓病自增
千里江山雙白髮
五更風雨一青燈
繁弦急管誰家宅
廢圃荒窰昔代陵
不寐坐聽雞唱盡
素光穿牖日華升

夜坐

殘缸背壁翳還明
坐擁衾裯閱五更
雲捲星河垂永夜
霜飛鼓角靜巖城
飄搖莫計餘生事
老病都非舊日情
想像故園憑夢到
愁來轉使夢難成

言意集
蔣山寺十月桃花

王母桃花此地栽風霜搖落爲誰開琳宮玉座同黃土絳蕊
丹跗自綠苔度朔烟霞違夢想武陵雲水怨歸來殘蜂刺蝶
相逢淺黃菊芙蓉莫浪猜

寒夜

月上前山夜寂寥江城鼓角殷寒宵魚龍水落滄溟靜鴻鴈
聲來紫塞遙風物自應隨律轉霜髯爭得見春消青釭冷暗
愁眠怯樓外頻移北斗杓

漫成

愁將短髮逢搖落漫把殘燈照寂寥兩地身心悲夜鵲五更
鐘鼓夢春潮驚寒栢葉垂垂靜向日霜華泫泫消悵望烟塵
滿長路紫芝空長故山苗

題秋江獨釣圖

秋風江上垂綸客知是嚴陵是太公細水浮嵐天與碧斜陽
炙面臉生紅形容想像丹青在歲月荒涼草澤空日暮忽然
聞欸乃蓼花楓葉忘西東

題墨竹

蒼梧山下無窮竹盡是湘妃淚種成烟雨不銷千古恨瓊環
虛度九秋聲見愁牧豎乘時伐可待伶倫學鳳鳴獨立淒涼
對圖一畝爲君惆悵一沾纓

詞意作文集
卷之十六
雪中有懷章三益葉景淵

歲莫懷人雪滿天
飢烏病客對淒然
地爐無火同誰坐
石硯生冰盡日眠
栗里何時歸白髮
茅簷幾處起青烟
稻畦麥隴看春及
土膏泉滋識有年

白髮

白髮應同春草莖
風吹一夜滿頭生
欲收浮豔歸根柢
故遣芳菲定老成
碧瓦曉霜憐變滅
紙窻宵月妬分明
據鞍上馬非吾事
賴爾莊嚴意不輕

愁感代哭

燕鴻北去又南來
斷壘荒岡幾劫灰
慈母磯寒風落木
望夫

石老雨添苔
江流定與天河合
客淚還經地底回
未必春光便銷歇
白華猶發燒殘梅

冬至

冬至微陽斡化機
閉關獨坐正相宜
白楊風掃經霜葉
翠栢冰凝泣露枝
日轉天南林影覺
春生地底水泉知
物華過眼成今古
愁絕看雲有所思

黃州團湖董氏鏡心樓

團湖四面開明鏡
中有高樓接泰清
絳氣往來蟾影入
碧光浮動日華生
雲間威鳳孤飛下
空裏遊魚作隊行
安得翠駢呼弄玉
金銀臺上卧吹笙

誠意伯文集
寄黃仲美

二十年前別故人
乾坤何處不風塵
玉缸阻對簷花夕
素髮羞同野草春
紫極星辰空有象
青冥波浪杳無津
歡華過眼成今昔
苦憶元方淚滿巾

春城

春盡江城不見花
似知白髮畏韶華
戰爭故習俱無賴
喪亂餘生未有涯
三島虹蜺昏日月
二儀風雨化龍蛇
何年百谷歸滄海
尋取河源泛客槎

舟中

雨翳青燈靜客舟
輕寒只戀敝貂裘
漫山薄霧穿牕濕
漱石鳴泉拍枕流
身在壺中天
萬里夢驚華表鶴
千秋愁來滴淚都
成血
直到滄溟水盡頭

鄉

至婺州聞官軍自溫處之江東所過皆空遂從間道還鄉
聞道人家總避軍
我亦獨穿豺虎羣
莫思身外路多棘
且喜雨晴山出雲林
端石磴鶻自占澗底風
松猿共聞他年想像
或夢到兩鬢白雪應紛紛

遣興

白露如珠滴素秋
啼螿絡緯寂然收
烟開碧水浮天遠
月帶銀河入海流
艷艷霜林張綺纈
瑤瑤風葉落鳴球
此時旅客

篝燈坐無奈黃昏一餉愁

搖落

搖落江天氣慘淒野黃雲白惑東西可憐飢鼠當人立無奈
寒鴉向客啼杳杳夕陽葭浦闊茫茫秋水稻田低銷魂何地
歸衰疾觸處烟塵沸鼓鼙

秋夕

栢葉蕭疎柳葉黃露華如玉綴空廊丹心欲共燈花結白髮
偏隨漏水長月色故園同窈窕蟲聲此夜獨淒涼寒鴉莫更
啼金井衰病能堪幾斷腸

感興七首

昭代仁聲浹九夷野無矛戟有鉉基誰言潢海操兵鬪却產
宮庭制禮時廣路駢駢周四牡陰風肅肅漢靈旗弔民伐罪
元戎事盱食宵衣上聖思

清時不樂道干戈鼯鼠其如虎豹何淮海風雲連鼓角湖山
花木怨笙歌紫微画省青烟入細柳空營白骨多惆悵無人
奏丹扆側身長望涕滂沱

衣冠共喜際雍熙豈意豺狼負盛時禮樂百年忘戰久風雲
八陣得才遲神謀不是閭閻識廟筭誰聞黼辰思慚愧鯁生
懶無用江湖愁望鬢成絲

將軍意氣薄丹霄欲把孤航截海潮蘓武節來無忌死岑彭

營惡子陽驕鳴鴉詩奏忠誰自松栢歌成恨豈銷悵望天涯
一灑淚鯨鯢罔象雜三苗

落日悲風雲滿州家家閉戶少炊烟也知渤海無龔遂漫意
邯鄲有魯連三尺青萍思出匣數莖白髮望歸田請看如鏡
南樓月此夜清光最可憐

天弧不解射封狼戰骨縱橫滿路傍古戍有狐鳴夜月高岡
無鳳集朝陽瑀戈画戟空文物廢井頽垣自雪霜漫說漢庭
思李牧未聞郎署遣馮唐

天上九關森虎豹人間七澤起龍蛇塵埃不辨風雲色雨露
全歸枳棘花秦國有人迷鹿馬周郊無土載蟲沙淮濱何日

歌常武腸斷嚴城戍鼓搥

越山亭晚望

越絕孤城枕海湄越王亭下景遲遲雲埋夏后藏書穴草沒
秦皇頌德碑鑿齒未馴虞禮樂戈船猶駐漢旌旗春風淡蕩
吹楊柳笑看吳鈞有所思

謁夏王廟有感

一片宮垣粉釐新前王陵廟在松筠玉書金簡歸天地貝葉
曇花詫鬼神滄海波濤紆職貢山川草木望時巡苗頑未狎
虞階舞空使忠良淚滿巾

寒夜忽然有懷周紫巖先生遂成口號奉寄且以酬黃

柑之惠

柱下先生住紫巖倚天愁嶺氣巉巉客來每託青猿報書寄
還憑白鳳銜日上寒光生水石月明晴翠落松杉旅人環重
黃柑贈愧乏瓊瑤荅素緘

冬暖

今年南國天氣暖十月赤城桃有花江楓未肯換故色汀草
強欲抽新芽野畦落日舞殘蝶小池過雨喧鳴蛙城上幾時
罷擊柝愁見海雲蒸晚霞

漫成

春雨日日送愁來雨中百花渾未開青山不見神禹穴碧草

已滿越王臺魚兒弄水浮還沒燕子尋巢去却回頭白楊雄
嬾獻賦衡門從此掩蒿萊

夏日雜興七首

眼見青苔上短垣忽看碧草翳衡門西來急雨寒聲壯東望
扶桑曉氣昏征戍誅求三載外詩書禮樂幾家存天涯地角
風塵滿極目雲霄漫斷魂

愛此南園僻有餘依稀景物似郊居風軒自舞蒼筤竹蓮沼
雙遊赤鯉魚釀酒剩收元亮秫換鵝時寫右軍書人生縱意
惟疎嬾莫遣門多長者車

聞道中原沸似糜倚楹長嘯不勝悲百年城郭連烽火千里

詞意作文集
桑麻委蕪藜南國久紆方叔旆東郊未返魯侯旗五湖何處
堪垂釣腸斷松楸入夢思

故里無書問遠遊他鄉萍梗漫淹留盲風恠雨蛟龍喜荒楚
寒蕪燕雀愁天上古今星北拱人間日夜水東流誰能走報
西王母乞與還丹駐黑頭

層樓迢遞俯清郊天際羣山檻外交日暖水禽鳴哺子風輕
沙燕語尋巢綠荷雨洗藏龜葉翠竹烟寒集鳳梢可嘆仲宣
歸未得苦吟終日倚衡茅

夏至陰生景漸催百年已半亦堪哀葺鱗不入龍影夢鍛羽
何勞燕雀猜雨砌蟬花粘碧草風簷螢火出蒼苔細觀景物

宜消遣寥落兼無濁酒杯

菱葉荷花漸滿池紅榴綠篠正相宜天邊日出園葵覺地底
雲生柱礎知長夏未應炎暑過薄寒恰似晚秋時朝來苦怪
雙青鬢輒向風前學素絲

夏日訪王友文畱飲贈詩

長夏園林白晝閑高軒畱客雨漫山傾壺竹葉沉沉綠落樹
楊梅顆顆殷檻外新荷搖水佩簷前弱柳舞風鬟醉來帶月
浮舟去忘却塵埃世路艱

題江村風雨圖

日落千山風雨來野昏林黑鳥飛迴風吹烟霧連天起雨送

雷霆入地回龍母鮫綃雲半濕巫娥貝闕夜深開暮寒燕子
歸華屋愁絕餘花委碧苔

次韻和岳季堅見寄

塵埃不見望諸君江海誰憐鄭廣文雪裏一筇穿虎出竹間
半榻與僧分無人問字朝眠穩有客論詩夜坐勤豹裘羊裘
等黃土金章紫綬漫浮雲

次韻和天童良上人見寄

不辭塵匣掩青萍願見天邊隕盜星白日有時容黑子紫微
終古照玄冥輕風淪雪歸蘭汜細雨涵春入草亭但得此身
疆健在江山相見眼長青

靈峯寺松風閣

靈峯寺閣倚松風風細松高閣更空何處流泉生石上有人
鳴玉下雲中花飄霧露春香滿影動龍蛇曉日融安得身如
列禦寇翩翩高舉出冥鴻

次韻高則誠雨中二首

短棹孤篷訪昔遊冷風淒雨不勝愁江湖滿地蛟螭浪杭稻
連天鼠雀秋莫恠賈生偏善哭從來杞國最多憂絕憐窗外
如珪月只爲離人照白頭

霖雨蕭蕭泥客途歲華冉冉隙中徂不知燕趙車千乘何似
嵩邱飯一盂露冷芙蓉捐玉佩天寒薏苡結明珠東鄰艇子

如堪借去釣松江巨口魚

吳苑西風禾黍黃越鄉倦客葛衣涼
楸梧夜冷鳥驚樹霜露
秋清蜂閉房天上出車無召虎人間賣卜有王郎
干戈滿目難回首夢到空山月滿堂

次韻和謙上人秋興七首

一自中原萬馬奔江淮今有幾州存
龍韜豹畧癡兒戲禮李
天桃猛士門廢壘秋風銷戰骨荒郊夜雨泣冤魂
江湖愁絕無家客佇立看天淚眼昏

東海波濤激迅飈西風氛霧虎狼驕
高牙画戟尊方伯繡段黃封出內朝
無客金戈椿鑿齒有人玉帳舞弓腰
武陵日暮

桃花盡何處林泉可採樵

霜飛大野氣淒清日落荒村少客行
投筆班超空食肉登樓
王粲獨傷情海壖雨翳旌旗影淮甸雲埋鼓角聲
中夜起瞻天北極鬚毛蕭颯憶神京

浙江流水繞東吳佳麗猶傳故國都
紅錦漫山春雨後黃雲壓樹曉霜餘
嬌鶯逐暖歸牙帳征鴈衝寒送羽書
惆悵南園釣舟子蒺藜滿地不勝鋤

繡幕香幃隱日華金鞍玉轡巧矜誇
深山霧雨驅生虎大海波濤虺作蛇
樸欬有枝寒集鵲梧桐無葉夜啼鴉
涼風嫋嫋吹游子何處松楸是汝家

故鄉知己不曾逢滿目雲山恨萬重
斥堠霜清寒夜柝譙樓
風急曉城鐘此時遶樹憐烏鵲異縣攜家想駟螭獨向晴簷
問梅蘂數枝和雪爲誰容
江上悲風起白波山中芳草奈愁何
紫菱青荇鮫人舞翠蘿
蒼藤木客歌曠野烟塵迷虎兕長亭泥濘沒驪駟濁河日夜
東流去腸斷霓旌影馭娑

法華山弘上人

可愛寒潭似鏡清清光寒氣襲軒楹
草根流水泠泠出石上
潛魚箇箇橫翠靄驚風和露滴白沙
得雨照人明故鄉近報
猶豺虎愁對滄浪詠濯纓

自天衣還城贈伯言

城上餘寒曉氣凝湖邊春樹綠層層
一山獨表秦王望衆水
皆朝夏后陵白眼嗣宗終嗜酒青鞋子
美謾尋僧仙都石室
烟霞裏早晚相攜策瘦藤

爲黃元微題画松

黃子宅邊松十尋兩株相倚自成林
半空鸞鳳翻清影長日
笙竽奏好音豈但茯苓能却老更有琥珀可安心
風塵瀕洞
還相憶寫掛高軒恨最深

秋感

日向天青木葉凋雲山漫漫故鄉遙
石牀墜露珠光動碧砌

幽花玉色銷十載故人俱土壤五更歸夢負漁樵懷來憶往
成惆悵蔓草羈蟲對寂寥

悼廢圃殘菊

舊菊將蕪尚有根高秋相顧耿無言芳心不共青莎死生態
猶欺白露繁要待靈均餐落蕊從教元亮耻空尊何人解識
淒涼意分付寒螿仔細論

侍宴鍾山應制

時蘭州方奏捷

清和天氣雨晴時翠麥黃花夾路岐萬里玉關馳露布九霄
金闕絢雲旗龍文騶裊驂鸞輅馬乳蒲萄入羽巵衰老自慚
無補報叨陪儀鳳侍瑤池

題李息齋墨竹

李侯貌出蒼篔竹葉上湘妃淚未乾烟雨晝迷丹鸞鶯霜風
秋勁碧琅玕修莖擬截伶倫管和氣潛驅嶰谷寒此意祇令
誰賞識高堂素壁靜時看

雲門寺作

若耶溪頭過新雨雲門寺前芳草長好將薜荔紉衣帶更取
辛荑結佩纒綠髮朱顏非昔日茂林修竹是他鄉東風且莫
吹花盡遠客傷春易斷腸

次韻和朱伯言自雲門之天衣途中作

卽看梅蕊發江南漸見柔桑可浴蠶日鑄雨餘峰似髻雲門

詩意作文集
卷之十六
烟合樹如藍青猿不避游人過碧澗能消宿酒酣况有山僧
頗解事何妨聊駐使君驂

送陳子晟省親歸連江

連江此去三千里綵服趨庭及早春閩嶺白雲迎馬首建溪
碧水渙龍鱗題橋兔穎畱南徼戀闕丹心照北辰鶴髮正須
三釜養鳳城雨露四時新

送黃生 泄祀福建

九重發政懷川嶽使者承宣下紫宸玉璫黃流敷帝澤碧
雞金馬出神珍風清五嶺烟霞肅春到三山雨露勻歸路武
夷溪九曲棠梨花映綠楊津

卽事

春半餘寒似暮秋掩門高坐日悠悠樹頭獨立知風鵲屋角
雙鳴喚兩鳩芳意自隨流水逝華年不爲老人畱浮花冶葉
休相笑自古英賢總一漚

遣興

江上潮來風捲沙城頭畢逋鳥尾訛燕泥半濕昨夜雨蛛網
忽粘何處花孤坐日月自閑暇出門岐路空交加漫將白髮
對芳草目送去鴻天一涯

乙卯歲首早朝奉天殿東翰林大本堂諸友

枝上鳴嚶報早春御溝波澹碧龍鱗旂常影動手官肅環珮

聲來萬國賓若乳露從霄漢落非烟雲抱翠華新從臣才俊
俱楊馬白首無能媿老身

元夜

玉漏遲遲出苑墻星河疎淡月輝煌送寒梅蘂清香細報喜
燈花紫燄光金闕曉霞來若木瑤池春色滿長楊君王注意
防驕佚萬歲千秋樂未央

次韻和劉彥箕憶山中篇

句曲峰高倚太陽不風巖谷自清涼四時嵐彩霏瓊雪百道
泉流湛玉霜雅稱采芝追綺季尤宜散髮學嵇康龍鱗璀璨
松當徑鳳尾雛雛竹過墻月上海門蟾早覺露寒天宇鶴先

嘗仙人卓劍降魑魅道士書符禁獮狂寶氣丹光生夜寂黃
精白朮引年長茅君虎臥瑤壇上蕭史鸞棲碧殿旁桂樹寒
山遠謝客桃花流水憶劉郎猿猱任占青蘿帳薜荔從生綠
石牀世難有身空自累詩成無鴈倩誰將欲憑錦瑟傳幽思
才理朱絃意已忘

彭澤阻風

風急雲飛江倒流請君聊且駐蘭舟浪翻彭蠡蛟螭橫雲壓
匡廬虎豹幽懷古謾尋元亮菊望鄉空倚仲宣樓五更歸夢
三千里一日廻腸九萬周嘯侶山棲憐野鹿伴人水宿感沙
鷗中元都府神官會上界星辰積氣浮地軸西南連少昊天

關東北鎮陽侯兩峰對擁青螺髻孤月初生白玉鈞龍甲冷
欺獰蜃市蚌胎光奪睡龍眸春撞急杵濤驚枕滴瀝真珠霰
洒凋枯樹掛崖眠復起老藤牽石墜還畱宮商調合靈鐘夕
鏘鏘稜高峭壁秋繡被焚香寒悄悄金環扣瑟夜悠悠竹枝
寫恨傳巴女木客長吟荅楚囚不寐殘缸猶閃滅動情鳴櫓
數啞謳蒼梧鳳逐重華去赤水珠無罔象求大宅高門荒町
墮頽垣敗塚鬧鴟鵂塵埃漠漠城笳怨蘆荻蕭蕭戍鼓愁鬼
火碧穿燈火去狼烟黃入燒烟道紫芝可茹林多磷紅鯉堪
曾澤有虬萬國鋤犁俱劍戟八陵松柏讓戈矛哀哀野哭乾
坤慘踽踽途行面目醜永憶盧敖翔汗漫願隨慧遠學清修

瑤臺青鳥歸何處玄圃琪華爛莫收滄海未容精衛塞蓬萊
定許佳伶遊故園梅蕊相將發倚賴春陽慰白頭

太師誠意伯劉文成公集卷之十六終





